

省齋文彙卷第二十九

廬陵周益國文忠公集二十九

邑後學歐陽棨介卿重刊

行狀 神道碑

左承奉郎直敷文閣主管臺州崇道觀王公

廷珪

行狀

公姓王氏諱廷珪字民瞻本貫吉州安福縣曾祖著故不仕祖祥故不仕父奭故不仕其先太原人八世祖該避唐末亂徙居廬陵郡西六十里之何山好善樂施人號長者偽吳順義元年龍見所居陂田間有異僧云是將爲佛寺公宜北去百里遇三白卽止子孫當繁衍且出文士長者如其言行至安成北之連嶺遇白馬一問其地名曰大白茅稍前曰小白茅乃家焉李氏

保大中龍復見何山遂爲龍田寺今金地寺是也公之在母大
父夢赤文巨天旣寤公生人知爲文字之祥矣元祐間自連嶺
徙居邑中公時爲兒童毅然有成人風年十二三刻志於學晝
夜不息弱冠通經史百家崇寧癸未舍法取士公一試右諸生
何損以對策貶廬陵故工部侍郎郭公孝友從之學一日聽公
講歸以大義告損損驚曰後來之雋也明年貢辟雍時方錮史
學禁士人說詩公獨與顯謨閣直學士劉公才邵吟誦自若丁
父憂家事一付弟姪縣榜其里曰清節未幾芝產塋上木連理
人謂孝友所致大觀間提舉本路學事張公根欲薦以入行公
曰此士之常乃以爲異即辭不就登政和八年第調衡州茶陵

丞邑大俗樸公擇秀士教以學應書者歲增猾吏文雅善交結
脅持橫甚前令丞莫敢治公獨發其奸言於郡黥徙之至今父
老能道其事也先是湖南田賦不均茶陵尤甚富者受田不受
稅以避力役公與令約凡執役者一毫無所須民旣不病役徐
下令正其賦不悛者沒入之自是產與稅偕而役均矣丞舊兼
造船場有部使者嘗薦公旣而委公役匠造私器公不可且歸
其章使者大怒會與守倅爭公事遂拂衣去潭帥曾公孝序挽
畱再三頌之宰掾倪公濤左官來致書願交且責監司不能容
一賢者其爲名人所重如此宣和末公年未五十知時事阽危
無宦游意學道著書若將終焉邑有瀘溪築草堂其上鄉人號

瀘溪先生執經來者屢滿戶外紹興初州賦屬邑修城期會迫
遽公語守令黃衡軍興民困城幸堅胡爲勞人衡告太守守大
怒將劾衡公謂衡君盍輕一官全民力乎衡卽日解印綬去守
聞愧甚爲輟是役趙丞相安撫江西奇衡薦於朝衡欲攀公固
避乃已公雖不仕常懷憂世心事苟宜民必告於當路宣諭劉
公大中李公案皆遣官屬咨訪利病公盡言無隱二公賴之嘗
著論二篇極言招安大盜之害洪帥李丞相奇其說未及行而
去後帥參政張公守遂以遺逸薦於朝郡守右史王公洋號儒
宗史師下車首以禮幣邀公虛正堂訪政事卽學宮聽公講經
一時士大夫多爲歌詩紀賓主之兩賢也十二年今敷文閣直

學士胡公銓以忠言忤時相謫嶺表親交無敢通問公獨送以
詩語峻驚人後數年時相知之命帥臣鞠公謗訕坐流辰州遠
人素重公爭以爲師武將馬羽攝郡事尤待公厚公謝曰某罪
人也將累公羽曰由公獲譴其榮多矣更遣子受業後遂登科
太上更化許公自便時年幾八十讀書益力夜對短檠作細字
率宵分乃寢今上卽位有薦公者一見語合詔畧曰粹然耆儒
凜有直節頃以言語文字牴牾權臣流落排根殆踰二紀召對
便殿敷奏詳華特改左承奉郎除國子監主簿公以年高力求
退命主管臺州崇道觀令所在州常加存問旣歸滋以道誼化
鄉閭無貴賤賢愚一接以誠平生工詩至是格力雄健興寄高

遠讀者不知其齒之宿也心畫端莊自其天性人貴珍之乾道六年冬再召赴闕固辭上不聽勅守臣備舟車禮遣仍以引道日間踰年始至對內殿特蠲拜跪禮賜坐勞問甚寵上欲留公公固乞歸於是制詔有司王某年九十餘而智識不衰行義益固錫對便坐富有嘉言其特除直敷文閣復以崇道俸祿之加賜寶香茶綵皆異恩也公蒙犯霜雪往來數千里略無勞瘁容明年三月己丑乃得微病啟手足詞色不亂則其所養可知矣享年九十有三娶同邑劉伯玉女前二十八年卒一男頤一女嫁將仕郎彭飛孫男二人澹□皆世其業孫女二人所著書有澹溪集五十卷易解二十卷六經講義十卷論語講義五卷語

錄五卷雜志五卷滄海遺珠二卷方外書十卷校字一卷鳳亭山叢錄一卷公學無不通而尤邃於易少嘗師鄉先生張汝明晚自得於言意之表漢上朱先生震文定胡公安國薊林向公子諱覓其解皆嘆賞以爲必傳公亦不輕示人欲獻公車會詩獄興郡守議收公理掾汪公涓奮曰王君剛介勇於義一紙書招之必來他掾變色云云自請提禁卒挾巡尉捕公守唯唯他掾遂行至則突入公家公談咲就逮家四壁立惟易解鐫篋中卒疑其貨也挈以去他日公嘆曰天厄吾書或謂今藏掾家云子頤卜以十年正月丙午葬公本縣清化鄉長賦之原使來速行狀將求銘於胡公惟昔伯父暨先君與公同爲政和戊戌進

士故知公詳其再召也某適對禁中坐定上問銓薦詩人朱熹
王其卿識之乎某既奏熹出處具言公年德文章在今未易多
得且登第五十三年矣上曰官卑何故某曰斯人早忤上官晚
復流竄官簿所以不進陛下若哀窮悼屈厚加品秩錫之章服
足以勸善上曰俟其至議之明年公至上命寓直西清蓋待以
卿監去朝禮某嘗白丞相濟公王某百年故老扶杖造朝意欲
掛其冠神武門丞相能爲上言俯聽所請而官其一子非美事
與丞相曰君言是也上必不爲老人惜一子官明日又言之丞
相曰決矣已而乃不報其或者欲公子孫自以儒業發聞於世
乎敢具列之敬俟筆削謹狀

京西北路制置安撫使孫公

昭遠 行狀 乾道七年

公諱昭遠字顯叔初名大年改今名其先眉州眉山人八世祖
長儒起書樓延名士講學蜀人號書樓孫家曾祖著明贈太子
少師妣崇國太夫人樊氏杞國太夫人李氏祖抃被遇仁宗參
嘉祐政事一誤作登 嘉祐進士以太子少傅致仕薨諡文懿葬開封子孫
遂爲鄭州管城人妣昌國太夫人王氏萬年縣君賀氏父喆歷
昌隨信陽三郡守終承議郎贈通議大夫妣碩人李氏公幼警
敏力學善屬文年二十四登元祐九年進士第時策問首及熙
豐凡不主新法者皆在末甲公其一也調長沙尉潭帥張舜民
文學氣節名天下奇公器識厚禮之教以立身行己之方丁外

艱服除主興國軍永興簿徽宗初元舜民自謫籍起爲諫議大夫不數日遷吏部侍郎公移書曰明公爲諫臣今天下事可憂者非一不知何所論而遷擢如此其速中外疑焉因條時事所當言者舜民以公書奏曰昭遠非獨曉臣一身進退之分凡今日急務不假臣言畧盡之矣尋辟河東經畧司勾當公事易三日皆畱佐幕府陝西方用師夏人乃窺河東時防秋兵纔五萬散處塞上帥司奉朝命聚師命王舜臣將之虜知有備去犯他路朝廷謂不當擅追舜臣兵入塞帥范鏜徙知河陽并劾主議者時同僚二人有親在公請獨坐遂免官閏四年始會赦起爲鳳翔府天興縣主簿政和二年用薦者改宣德郎用亳州譙縣

改同知解州安邑縣兼鹽池皆不赴爲永興軍路安撫司勾當公事再任都大提舉權茶馬司勾當公事熙河路積緡錢四千萬隨軍轉運使欲以便宜移用公力爭不可漕歎曰吾僚宜有若人乎未幾漕移帥秦鳳鄜延皆首辟公奏再上而本司爭於朝因是詔茶司官屬他司毋得辟久之執政聞公名再召審察率以不阿附不得用宣和二年以朝請大夫通判滑州兵馬司吏王寔結宦官橫甚前後守臣莫敢治公一日攝行郡事適有訟寔者捕寔獄籍其家賊萬計杖而黥之河溢胙城逼房村埽公督役而埽欲壞吏卒往往潛遁公不爲動人以比王尊云孟昌齡既鑿三山創天成聖功二橋而聖功隸滑秋水至橋輒壞

都水監挾中貴人歲督繫橋費不貲民破產相踵公條其可省者上之滑當河北要衝時方取燕過師無虛月而州兵凡十指揮沿河埽兵倍之倉廩大匱一日月給稍腐衆囂甚持挺逐倉官且擁太守以去人皆汹懼公至曉以禍福且徧開倉示之曰汝視此與給汝者果異乎衆帖服公乃白守治其爲首者是日徵公幾亂用士民舉畱再任宣和末盜起河朔或薦公充河北山東路撫諭盜賊勾當公事有旨入覲就除河北燕山路轉運副使詔給中都錢三百萬緡羅米三十萬石餉燕山又許辟其屬十人非常制也數月羅告備會孟揆以工部侍郎兼水陸轉運使自詭羅米五十萬饟新邊旣不足則雜沙石其中而謂公

實爲之亦會同列有憾公者亟奏其事貶廣南監酒燕帥蔡靖飛章辨其枉猶降三官領舊職靖康元年召爲尙書水部員外郎言者謂京師所發關陝器甲及解鹽鈔綱皆滯滯於道命公措置點檢催促公區處有方以時畢至卽計軍器之有餘者請還之使備西邊又祖宗時解鹽鈔面錢止六千至是增爲八千公奏曰以銀折銅錢熙寧中皮公弼之失帖納鈔面錢政和中魏伯芻之貪今復展轉佑銀鹽價益貴願從舊法朝廷皆從之金圍太原我師多潰欽宗命折彥質乘傳招集彥質言汾州潰兵三萬過河津乞選朝臣同陝西帥臣招集任委官部還河東詔命公往公言軍士逃歸其氣已索理難復遣不若就令西戍

猶冀有功也又論長安河中不可不爲備今所在州縣調保甲乘城其實自衛不若擇要害地使控扼不聽初公以六月使陝而以十月末還京師十一月十四日敵陷洛陽京師戒嚴西京留守西道都總管王襄移治襄漢欽宗命擇副襄者使督師陝右中書侍郎何奩以公聞特除秘閣修撰西道副都總管與三路帥臣序官仍許便宜從事公奉詔卽以五兵三馬出西門十八日金騎已過鄭道梗不能達乃復至京抵南門將道尉氏而都城已守禦公下馬望闕再拜而去道招潰卒得數百人由南陽入商洛出藍田遂至京北時閏十一月也制置使錢蓋遣統制官杜常夏淑將士數萬至京西而潰永興路安撫使范致虛

自稱御前會合軍馬勤王入援所號召諸路之師公至督其進曰天子初命四道總管也兵得調發官得廢置財穀得移用急則總師援王室今京師圍急日暮望救至逗留可乎言詞慷慨聞者感動又遍檄諸帥使出師已而環慶帥王似熙河帥王倚各以師來會而涇原帥席貢秦鳳帥趙點鄜延帥張深皆不至公二十八疏劾之合諸路兵得十餘萬范致虛命馬祐昌統之斬杜常夏淑於華陰公與致虛同出關俄祐昌遇敵於石壕千秋間戰敗績致虛還京北公獨與王似王倚畱陝金并兵攻陝陷之時西蜀輸金帛助河東公用其屬韓武張延齡計止之河池籍募兵得精銳數千軍甫振而京師陷乃遣使至大元帥府

建炎元年五月太上皇帝卽位詔公入覲公御下嚴整所過肅然內鄉賊尙虎擁衆數萬餘公遇而破之見太上南都頓首涕泣謝奉使無狀太上慰勉之除河南尹西京畱守西道都總管悉以公所提西兵數千付御營統制官張俊止以蜀兵數百上道七月至洛收集散亡招撫豪傑調兵陝西河北合義兵萬餘人柵伊陽使民入保會罷四道都總管以公爲京西北路制置安撫使西師旣非所隸悉引去公數以洛無城池而強敵對境侵牧之狀聞於朝又與諸子書曰今日扞禦甚難若假一歲庶或可保吾四男二女今不復念要爲忠義死耳汝曹加意讀聖人書行古人事無以我爲念十二月金兵來攻公悉衆扞禦曉

將姚慶戰偃師死之公卽命將官王仔等奉啟運諸殿神御間道走行在金兵益熾公戰益不利而金已破岐雍秦隴南侵唐鄧陳蔡潰兵滿野公猶招集之已而見公麾下單弱欲擁公南公罵曰若等平日衣食縣官不以此時報國今將何爲叛兵怒起擊公遂死焉官屬從者皆死二年正月十四日也是秋神御方至行在四年夏錄公忠義詔贈徽猷閣待制官其子孫三人後以二子升朝累贈左金紫光祿大夫公天資孝友輕財重義尤喜卹孤幼教育嫁娶咸有成立遇事剛果議論詳明待人一以至誠未嘗附麗干進好學老而不衰與人商論古今及本朝故實纒纒可聽晚值時難志大而命不副卒以身殉士論惜之

享年五十八先娶李氏公舅女也累贈和義郡夫人再娶張氏
戶部員外郎岫之女累贈永嘉郡夫人四子右從政郎監潭州
南嶽廟炳文右朝奉大夫知常德府賁文右朝奉大夫知南雄
州憲文右迪功郎右文女適右朝奉大夫前知萬州鮮于噩右
宣教郎新知通州胡倚孫男十人共懿右承議郎知建昌軍南
城縣餘未仕女九人曾孫男女八人公既沒賁文崎嶇兵間訪
公柩於死所赴弔者悼公之忠懷公之惠無不流涕是年八月
殯真州之六合後八年乃克葬於婺州金華縣赤松鄉戴家塢
予生晚不及識公南雄君以同里之故求次公事實甚切惟公
忠節昭然足以不朽而南雄君罔墜先訓自以才猷發聞於世

近臣數薦之所以顯揚其親者固將有在尙奚待予言若夫紀
歲月序閭閻以備太史氏之採擇則亦不得而廢也

左朝議大夫充敷文閣待制致仕柳公

約神道碑 紹興三十三年

上卽位之三年冬朔騎大入踰淮涉江蹂我二浙右丞相充以
宣撫使護諸將畏敵不能拒擁衆北去金陵會稽皆守以近臣
亦愛一死不以謝國家其餘望風震讐鮮有奔問官守者故敷
文閣待制柳公約當是時以直龍圖閣守嚴州悉力扞賊境內
旣安堵則慨然上書請糾合諸郡克復吳會上親筆答曰寇陷
臨安朕方避地將士鮮復用命嘉卿請行寤寐不忘卿更審量
事宜率士進討會虜退而止明年三月上念公之忠制詔有司

柳約當狂敵猖獗鄰邦紛擾之時力圖禦敵賊無敢犯者其以約充右文殿修撰守郡如故十月又詔曰軍興費出無藝吏慢弗虔柳約獨謹賦輸率先程督其進秩一等又明年三月詔曰柳約郡當敵衝而能不辭難不避事益嚴列柵保綏一方朕甚嘉之其以約充集英殿修撰寵數便蕃度越倫輩上心猶未愜也十月遂趣公入對獎勞再三擢權尙書戶部侍郎公於是感激奮勵悉力盡言凡例外宣索皆執奏不進如論吳玠等罪未正非所以勵臣節諸大將提兵入覲各召其家將有尾大不掉之患皆衆人噤莫敢發者會高麗請修貢議遣使報聘上顧廷臣無出公右加試戶部侍郎充其選且有大有用意當路忌之諷

言者誣以事罷爲提舉江州太平觀蓋公之出處大概如此至紹興壬午公歿十有七年矣其仲子右朝散郎江南西路轉運判官大節以書抵某曰先人墓道斷石久矣而辭未刻子嘗列職太史氏知先人宜詳願以屬子某與轉運君同朝久辭之不可乃取公節義著於士大夫耳目者表而出之且具載天子制書所以褒表公者然後考其世次官闕而叙之按柳氏得姓於展季子孫自魯入楚其後或遷河東或徙汝潁遂仕江表至公之遠祖有自縉雲徙杭者未幾復遷嘉禾今蓋爲秀之華亭人也曾祖諱昉妣高氏祖諱昌贈特進妣華原郡夫人陳氏考諱廷俊被遇三朝仕至述古殿學士贈開府儀同三司妣和國太

夫人胡氏公字元禮登大觀三年上舍第試學官中之授霸州州學教授徙睦州入爲辟離正遷博士改宣義郎充廣親宅宗子博士公深於經術而屬詞粹嫩大爲學者宗仰徽宗雅欲試之命提舉福建路學事宣和三年遂召對論內外學政甚悉次乞罷內外官到堂日投牒求官以厚風俗帝說諭旨除郎爲權倖沮止得秘書省校書郎四年兼充編修汴都志編類官明年進著作佐郎爲府監發解別試所考試官吏印武士內外舍試卷差互坐失覺察送吏部注徽州司錄改通判宿州郡僚以事相持牢不可解公曉之曰某直近許某曲近不孫曲固麗於罪許且干清議奈何其人愧服勿敢爭人益知公爲長者七年召

拜監察御史靖康初兼權殿中侍御史常論三鎮不可棄改尙書工部員外郎進左司郎官丁父憂服闋以直顯謨閣充御營使司參議官遷太常少卿己酉秋車駕將自金陵移蹕平江公疏言兵可進毋示賊以怯九月除直龍圖閣知臺州未至徙嚴州兼兩浙西路兵馬都監節制管內軍馬自是遂以忠勞召用用未久而罷名稱益重雖上亦眷公不已居七年復秘閣修撰會侵疆來歸起知蔡州公被命卽行畧無顧迴意未幾虜渝平得檄河南守臣皆舉城降公獨驛聞復遣使數輩乞師於武昌紹興十五年秋上章告老九月十五日以疾卒於家訃聞優贈

四官勉思如故事士大夫皆以不大用爲公惜享年六十有四官自將仕郎轉至左朝議大夫累贈左宣奉大夫娶魏氏吏部侍郎憲之猶子早卒贈碩人三子大方右從政郎廣德軍廣德丞後公一年卒次轉運君也才自見更內外任使號能守其家法者次大辨右承奉郎湖廣江西京西總領司幹辦公事孫男女十一人公天性至孝和國病甚泣禱於天願損壽以益親和國尋愈其後公竟先兩月卒遺命曰述古葬臨安之西溪我死無宅卜諸子遂以是年十二月四日亦葬公西溪去先塋才數武云世言儒者不適於用此殆見夫誦說章句敝敝拘拘以儒其名而無其實者爾公以待從子當承平時由文學自奮歷

踐臺閣純明茂美不懈於位人罔末知其應變如何一旦國步多艱於橫潰中屹保孤城悉其賦輿欽獎王室用能進无之休顯著勲劾及擇聘使首在選中雖遏於讒其節益著儒者之効至是稍白彼平時號烈丈夫以剛明忠勇自任臨事往往周章以越虜驚鼠竄甚至毀節附賊偷生頃刻視公施設孰爲賢否且有聲詩以信後世其詞曰

今移於忠勇出於仁古所爲儒不在斯人當用而迂乃我之羞心與實違又儒之仇恂恂柳公性行淑均王室多難其氣始振有力必陳有言必進國如奠安身也何病駕避海隅公撫一邦敵氣折衝斲其披猖上曰忠哉屢賜爾祉有華禁路公焉是履

沃日之濤誰復安行不憚不辭惟公竭誠嗟嗟讒言曾不公釋可奪者位莫掩者德天子是思起守新疆獫狁孔熾毀節相望公駟而聞上曰邁返次對西廂始卒尊顯誰嗇之年不執事樞考行察終展也醇儒我作銘詩著其大要既垂無窮亦諗有廟

興國太守贈太保王公絢神道碑

興國太守安陽王公既卽世之三十二年當乾道四年春上用公之子清源公簽書樞密院事三日制詔司封按故事贈公太子少師粵六年冬祀禮成清源公以參知政事宣撫全蜀復有太子太師之命明年清源公卽拜樞密院使恩數如宰臣又贈公少師九年郊需遂贈太保鈿軸錦韜祭其盈囊於是清源公

以趣召還朝半道上書天子願奉外祠歸展先墓既得請則致告焚於塋下泣而言曰予惟先烈是承有此爵位凡所以發揚潛德振宣幽光既備載於訓詞獨隧道之碑久而未刻小子其何敢安乃以尚書郎陶公泰之狀來請銘按王氏望於浙東漢名霸者號其鄉曰君子鄉自是代爲士族公之遠祖始徙常山真定以財雄北州五季遷博平又徙相州今爲安陽人也四世王承錫當國初以明經起家仕至尚書主客郎中河東轉運使主客生殿中丞知青州益昌縣悅清修不競鄉里復以王君子呼之後贈尚書禮部侍郎其葬也龍圖閣直學士趙公師民爲之誌配張氏賈氏范氏贈樂平廣平博平三郡太夫人生子五

人皆舉進士時謂五龍中子東珣張出也慶厯六年進士筭嘗
典三州年六十一卽杜門不出官至朝議大夫卒年八十二後
贈太保龍圖閣待制盛公陶實銘其墓配劉氏贈慶國夫人太
涿生同州馮翌縣令贈少師審禮卽公父也母陳氏許氏皆贈
高國夫人惟公奕世種德其施甚遠公又承祖考之休而避其
取急國家之病而辭其祿宜羸厥躬以昌後人是生名臣爲宋
輔弼出人將相福祿未艾易曰積善之家必餘慶傳曰非此
其身在其子孫其弗信矣乎公諱絢字敏功生而穎異太保鍾
愛焉元祐八年奏爲太廟齋郎紹聖四年太保薨哀慕如成人
年十六少師沒於馮翊欲歸柩安陽而力不給會部使者至公

衰經踵門伏地號訴使者義之率州官贖其行謂王氏有子矣
免喪以將仕郎主大名府成安簿大觀初河北置糴使司且鑄
夾錫鉄錢都轉運使梁公子美聞公才辟監磁州裕民第二監
兵多不逞圍諸重垣棘圍之中邏卒擊柝以衛猶有逸者會詔
廢監其徒闖扉謀叛人心克懼公梯墻入大呼曉以禍福衆唯
唯聽命州上其事不報去爲陳州南頓尉右史張公來居宛邱
一見奇之授六經杜詩公自是博極羣書作詩尤豪逸未幾許
夫人疾沿檄就醫京師凡以藝名無不造焉醫感其誠咸願盡
力而夫人竟不起公護喪雪行歸鄉終制授蔡州真陽令政和
間推行道教青苗役法保甲市易居養安濟漏澤等事有司覲

賞趣辦苛擾公獨以身庇民未嘗咎責而事以濟上官交薦改
宣教郎知大名府崇城縣宣和三年四月河決恩州魏之隄防
素固都水使者欲藉以爲功調急夫數萬斂薪芻無菑刻期增
柴蠶麥方登民胥怨苦公職兼埽岸部夫堤工力言堤必不決
訥俟農隙使者不從公憂衆潰以便宜散遣傍邑從而效之使
者劾其慢事下府尹轉運使審究兩司力佑公竟得無他重貫
宣撫幽燕凡累朝兵仗數百萬貯北京者皆取以實邊又調民
守烽燧運金穀文書旁午動以軍法繩官吏公知亂將作投劾
還家平墳墓鬻產業南徙蔡州族黨交誚公毅然不顧求知無
爲軍之巢縣蒞事纔累月而金人入寇衆始服公先見依公者

相屬也靖康元年汴都戒嚴四方勤王兵過縣無虛日公用行
營法徧芟舍居之饋餉素備無秋毫擾寇閣瑾破黃州將掠舒
蘄提點刑獄胡憲可謀於公公爲草檄遣客說瑾瑾卽引去時
羣盜蠡起公策巢當江淮衝要乃環邑浚壕因土爲城引焦湖
水灌壕中其南以大河爲固版築未合而賊李仲者號李鐵棒
擁衆蟻集公率鄉丁拒守伏砲斃一騎賊怒益治攻具會光堯
登極赦至公募士持赦諭賊令斂兵歸行在仲驚喜下馬拜赦
連呼萬歲以書謝公遂趨南京當是時巢以東羣邑晏然賴公
力爲多俄劇盜張遇號一窠蜂自京東轉剽數州無敢撓其鋒
旣焚溧陽巢境大震公披甲督民築城手發百矢不倦殺賊甚

衆賊謀知南城未合潛以甲士後湖來夾攻公力戰水濱身中數矢左右殊死鬪賊爲小卻而同僚守壁者不能支賊遂登陴公亦創甚或挾公登小舟僅免賊嘆曰吾橫行列城未嘗遇敵如此約其下毋縱火殺人畱一夕過池陽聚千艘帆風上江鄂矣制置使劉公光世具以事聞因奏公節制淮西兵甲沿江捍禦已而賊復自鄂東下聞公屯北岸舟不敢泊劉公再上公功詔進秩一等監察御史寇防撫諭淮西路張本作撫諭江淮四路又表公勞有旨畱再任壽春守康允之移帥浙西辟公幹辦公事建炎三年冬金虜陷秣陵車駕幸浙東議者慮虜道窳國踰千秋嶺入於潛詔允之擇官統民兵扼嶺下衆有難色公慨然請行且

密謂允之虜勢張甚吳人豈能支若用團結義社四萬退守富陽臨安之險令士庶散保於潛昌化聚江下之舟載倉庫粟帛如富陽空杭城以委之彼來無所掠止無所資欲濟則舟不可得又聞義社分守旁邑將畏首畏尾不暇我以銳師乘之或可得志此上策也允之不聽公行及餘杭有披髮南奔者問何人曰橘商也遇胡於溧陽晝夜疾馳是以獲免彼行如鬼亦且至矣時虜知簽樞周公望帥衆十萬屯姑蘇而允之必阻千秋故自溧陽度獨松嶺掩我不備公移書告允之幕吏猶疑不實請再遣覘者尋而游騎數百奄至北郭陳桑林中允之大驚出兵禦之知其果虜也皆望風潰城中遂煨燼矣允之始悔不用公

言公在千秋飭備甚至姦阝乘亂相攻刼公往來彈壓誅其尤無良者人情以安他日州縣吏多被臯惟公用勞遷秩駕還會稽趙忠簡公簽書樞密院事請置計議官四員專治機速賞功事首薦公爲之時疆場日駭盜賊所在蟠結公謂宜駐蹕江寧內降羣盜外臨中原失此時不爲南北之勢分矣又上急務數條未及行而忠簡公去位公亦請外得知興國軍蓋四年九月也李成之叛分兵據軍治紹興元年五月趣公之官單車行荆棘中至累日不見人烟八月始視事賊雖去而官府草創豪右暴橫公竭力爬梳始就繩墨日夜督屬令招集耕農貸以種糧初至斗米劬鹽率直三千已而流逋四歸井邑漸復物價亦平

二年六月詔曰王某奉詔令勞民不怠厥功茂焉可召赴都堂審察無何言者謂涓郡方倚良守胡可遽奪乃命遷一官任滿褒擢久之淮南潰卒路進以千人濟江薄境軍無城壘廂禁兵不滿百公亟乞師於蘄州戍將李山且聲言悉營兵合擊進聞遯去人謂微公應變有方一邦復塗炭矣四年力求祠官卜居廬阜日與高僧及隱者游超然若有所得山中人往往攜酒候道左公輒與班荆劇飲年纔五十賦詩送人赴南營云我欲挂冠去君當衣錦還人歎公之達而不疑將逝也八月十四日乃以疾卒十月一日葬山南丹桂鄉栗里村殊原山積官右朝請大夫娶宜人韓氏陳氏皆贈福國夫人二子長卽清源公炎今

爲觀文殿大學士湖南安撫使次日圭終迪功郎邵武縣主簿
孫四人思牧將仕郎蚤世思齊承務郎思訥承奉郎一爲僧曾
孫二人伯輝承務郎伯焯未官公才雄氣豪身長六尺餘音吐
洪暢飲酒至數斗不亂談辯滾滾遇事迎刃輒解蓋偉人也中
興初士習久安鮮能自奮於功名公在下位獨表表有聞守巢
功雖不終智勇已可見入浙帥幕言雖不用策慮則遠矣趙忠
簡深知之方入相而公歿其命也夫銘曰

遠矣王宗其來有承如彼大川至公方增問其才學允文且武
問其政事利興弊補士患無時時方艱虞公止一邦而志弗舒
士鮮已知知己實相公如相避命也奚悵二者則然壽宜邈綿
誰不耄老公又無年天於斯人報施常必畀公以豐胡受也嗇
蓋身之逢百年易終以貽後人奕世不窮子旣顯矣孫亦未艾
刻銘昭之尙勸無怠

權太常少卿贈銀青光祿大夫滕公

庚神道碑 淳熙六年

睢陽滕子濟子端爲兒童時俱負雋聲踰冠同登崇寧五年進
士第相繼中詞學兼茂科政和宣和中先後入秘書省爲正字
爲著作佐郎他人方附麗權門躡取顯宦二公獨恂恂自守滯
留儒館泊如也光堯皇帝中興於南京首用鄉閭之望子濟旣
由太常少卿登壇盛禮仍草告天肆雋之文子端旋以博士討
論典故蓋其踐歷往往同時亦或相代人號衣冠盛事會宰相

惡陳東歐陽澈之訐直加以大辟子端卽上疏申救且移書相府復欲面詆之爲同舍郎扞止義槩籍籍搢紳間已而從幸廣陵子濟由左史遷中書舍人子端亦爲郎文昌省攝容臺事駸駸進用矣是歲十二月十八日子端遽以疾卒不二年子濟遂自諫大夫入翰林登樞府故君子於子端尤太息焉壽才四十二明年長子瑾挈柩南渡旋窆於婺州金華縣北山俱賦張本作賦之原至淳熙四年瑾守通州其弟琛守舒州書來言曰先人蚤世於今五十年賴遺訓餘澤兄弟分守兩淮銀印青綬追爵三品惟是墓道有碑而詞未刻死且不瞑敢以爲請某舊嘗讀公之文又聞救東澈事欣慕其高節且於二守嘗同朝同僚其何

可辭乃序而銘之公諱庠字子端世居應天府宋城縣曾祖衛尉寺丞堯臣贈太子少保妣晉安郡夫人王氏信安郡夫人陳氏祖宣德郎公綽贈太子少傅妣魏郡夫人張氏魯郡夫人鄭氏父左朝請大夫知鄂州友贈太子少師妣蜀郡夫人常氏公少力學年十二爲文瘞死禽磨瓦書之題曰爵王墓碑自是丕酒嬉笑率寓於文見者驚異初仕爲將仕郎蔡州新息尉屢號清和縣尉秩滿陞通仕郎調陳州商水丞旣中科目循文林郎爲九域圖志所編修官改宣教郎徽宗幸秘書省轉奉議郎歷承議郎除正字九域志成轉朝奉郎駕再幸省轉朝散郎遂佐著作進朝請郎丁內外艱建炎初元起爲太常博士轉朝奉大

夫擢都官員外郎時庶事草創賞功補副尉者不可計是非混
淆公謂興復大業在信賞必罰今吏以微文沮所當得而以賅
謝予其不當得何以鼓天下忠義之氣又帖給吏手多假託權
勢取之因轉售於人冒濫滋甚於是隨事爬梳聞諸朝嚴其籍
轉朝散大夫兼權太常少卿初李丞相綱素善公其論救東澈
也當路頗以爲憾久稍諒其無他委看定四方封事公晝夜省
閱凡可行者差次潤色類以奉御欲裨助初政憊心疲精失食
飲節坐是致疾吏邪儼乘時爲姦公力疾案治之無何長貳侻
儼咎之而已公嘆曰吾爲郎治一吏不見信况敢望協心爲國
乎天下事畧可見矣因忽忽不樂以至於沒搢紳嗟惜公天資

明敏恢宏自信爲文章立成下至書算藝術見輒能之惟於仕
進不汲汲在館閣踰八年非旅進不至政府日鈔異書以廣見
聞少師公與弟比登儒科坐上書入元祐黨晚御諸子甚嚴公
朝服受教責畧無惰容修身謹行惟恐貽親憂同父昆弟姊妹
十五人極其友愛初娶常氏諫議大夫安民女追封信安郡夫
人再娶路氏寶文閣直學士昌衡女追封咸寧郡夫人五子三
女皆路出璫璆早亡次通州次瑞未仕季舒州也長女適右迪
功郎馮揆次適左奉議郎駱仲舉餘不及嫁孫男七人仲通仲
容仲雍仲山仲忱仲恂仲宦仲容迪功郎福州懷安縣主簿孫
女四人長適迪功郎新鎮江府司法參軍呂祖恕餘尙幼銘曰

赫赫祥光龍飛宋都雝雝雁行漸於鄉閭可用為儀匪直其羽
亦有忠言以驚該輔伯兮先登秉國事樞季止即潛命也何居
天之於人報有先後不於其身必蕃厥胄是生良子剖符相望
追爵三品密章未央公文可傳公行可紀詩以聲之公為不死

省齋文彙卷二十九終

省齋文彙卷第三十

廬陵周益國文忠公集三十

邑後學歐陽棨介卿重刊

神道碑

樞密使贈金紫光祿大夫汪公

澈

神道碑

紹熙二年十一月

公諱澈字明遠姓汪氏系出新安南唐保太中徙饒州浮梁縣
曾祖仲宣贈太保妣徐氏衛國夫人祖叔寶贈大師惠國公妣
陳氏益國夫人考俊修贈太師慶國公妣檀氏秦國夫人三世
皆以詩書訓子弟張本作孫公生穎異幼從伯兄沆學博覽羣書尤
長於春秋登紹興八年進士第主臨江軍新喻簿從軍器少監
鮑瑒檢察荆湖軍改吉州州學教授父憂不赴服除教授衡沅

二州万俟忠靖公謫沅知公可任重二十六年入相薦召爲秘書省正字兼實錄院檢討官遷校書郎國史院編修官安分無求視同舍郎數遷殊不介意二十九年三月輪對論立國二道曰文與武宜令帥臣監司舉所部大小使臣智謀深遠可備鎮防武藝超絕可帥士卒者在內則侍從臺諫各薦所知務得其實實則精不必求多多則泛毋問小疵毋拘常制高宗嘉納卽詔內外薦舉武臣而擢公監察御史尋進殿中侍御史特賜鞍馬和戎浸久邊防懈弛公力陳養賢養民養兵及自治預備之說反覆累數千言其他如有司毋得援例破成法并廢教坊皆自公發之顯仁皇后攢宮旣訖工議者欲廣四隅凡土庶墳在

二十里內皆當遷公言陰陽家說難信與帝意合命公按視公還奏昭慈徽宗顯肅懿節四陵園舊占百步已數十年何今日爲是紛紛且漢長樂未央宮夾櫛里疾墓未嘗遷也唐張說坎其宅東北隅人謂洩王氣今就如議者言則穿穴邱壠恐非徒無益按國朝宮陵儀制在封堠界內不許開故合耐願遷出者聽其意深矣帝大悟一切如故三十年知樞密院事葉公義問使金歸頗知入寇之謀公申言選將帥爲兵備八月遷侍御史賜緋衣銀魚時酒課虧國用不足公請戢私酤或遂議以贍軍庫付殿前司公言兵權利柄出於一他日將不可制又論鎮江大將劉寶十罪乞行誅斥又論往歲經界法行隱漏稅多諸郡

經總制錢一時羨溢嗣歲卽虧今乃以爲額必至病民願詔戶部別取十年通數而用其中事皆施行當國者多過舉公疏罷之明年上元前一日風雷雨雪交作春大寒有旨令侍從臺諫條具消弭災異之術公謂天變不虛其應在兵今荆襄無統督江海乏備禦凡陳十二事皆內修外攘計會詔政事並用祖宗舊制公言近歲武爵遷轉太驟請復六等檢校官總管鈐轄路分都監除授超躐當遴其選於是詔兩省詳議其後稍復舊制云金使高景山因賀天中節報欽宗升遐且索將相求釁公請置使江干益兵上流守淮甸備海道然後下哀痛之詔布告中外是月除御史中丞遣大將成閔提禁旅五萬屯荆襄而公遂

爲宣諭使大率如公前後所陳詔書畧曰撫勞將士體訪事宜凡其所臨如朕親幸公自以身任言責凡川陝江淮利害悉以聞由鄂渚歷江陵走襄陽具宣天子恩意拊循諸軍勉將帥以忠義人人感激思奮時田師中戍鄂李道成荆吳拱以蜀兵戍襄成閔屯鄂鄂間公以師中老病劾去之襄披城爲山寨荆治水堡公曰此特自守計耳敵至當力戰逐北奈何坐困乎乃部分諸將乘邊還武昌調軍食九月金犯信陽光化諸將戰却之俄金師大至與我軍相持公乞下詔進討而駕幸金陵乃升閔京西河北西路詔討使實聽宣諭司節制公欲乘完顏亮駐淮南檄諸將分兵出唐鄧陳蔡直擣京洛使亮腹背受敵可成大

功會兩淮失守駙召閔軍入援公志不就惟以荆襄軍當金將劉萼十萬之衆項之牒報金謀自光黃渡江襲武昌入江西詔拱分兵還戍江岸拱卽將而南公在武昌馳書責拱還襄陽自調鄂之餘兵悉戰艦聲言備光黃敵計不得行拱僅抵峴首金師掩至大戰漢水上敵衆敗走唐鄧陳蔡汝潁相次歸職方未幾亮死公乞出兵淮甸與荆襄軍夾擊其歸師未報而金之新主罷兵請和矣三十二年春駕留金陵公請奏事詔需後公復條奏便宜三月趣公朝臨安虛政府以待甫人對卽拜參知政事六月內禪公與宰相陳魯公及二樞臣俱膺佐命之寄壽皇旣御極銳意恢復首用張忠獻公使江淮而命公督視荆襄軍

馬將分路進討公開府襄陽遣趙樽守唐王宣守鄧別選偏將分據要害皇甫倜擁衆萬餘柵陳蔡間未有所屬公請賜軍號官爵果爲名將初蜀帥頓德順軍爲金所圍公欲以兵助倜牽制之會上命中使梁珂齎手筆勞公曰卿文武兼資帷幄大臣以戰以守臨機制變公因奏金方併力拒西師宜分命趙樽王宣潛師襲洛仍令兩淮犄角中原遺民必響應一舉可定豈特解西師而已是時金師移文江淮督府議和復揚言入寇上慮公銳於進取諭旨未宜分兵遠畧公念襄漢宿兵饋糧艱阻昔之沃壤彌望荆榛乃與漕臣呂擢姚岳議因右張本作古長渠築堰通流募間民汰冗卒十人爲甲五甲爲隊三隊爲屯授地給牛

各有等差貸之種穀授之廬舍而薄其課秋成第輸種餘穀官以緡錢市之畫爲三十八屯規模詳密人方勸趨而西師退保虜勢遂張蓋隆興元年也宸翰數飭修邊備公請入奏軍事上復遣內侍甘澤賜親札曰入寇無虞可暫入覲仍賜金合茶藥非常典也方公歸武昌候命而張忠獻公先入朝密以迎降人張本爲名刻期大舉雖宰相亦不與聞詔公出師應之公以前議驟變上奏曰虜自得志陝右陳兵壓境姑遷延避盛夏將期秋冬一決和戰浚先發固善獨未知能度彼已有必勝之策否願許臣對面論形勢詔可而我師已踰淮公知言不用乞令張公併領荆襄號令歸一俄李顯忠師潰公道乞奉祠除資政殿

學士提舉臨安府洞霄宮言者隨攻之落職台州居住明年冬有旨自便纔兩月復端明殿學士知建康府視事於乾道元年春上浸察前讒深念公之功九月召知樞密院事遂升樞密使立班恩數並同宰臣公以南渡後非舊相若官至公孤不以拜再三辭上曰卿將命馳驅經歷爲多故授此職嘗密訪人才公舉所知百餘人第其材器復於上二年引疾上固留不能奪以觀文殿學士再領洞霄越三月起知鄂州兼管内安撫使蓋上知公兩使荆襄有經武整軍之勲將倚規恢也繼訪公邊事公奏向者我有唐鄧爲藩籬又皇甫侗控扼陳蔡間敵兵不敢窺襄比既失兩郡侗復內徙敵屯新野相距百里耳臣嘗令趙樽

王宣築城郭儲芻糧守備要害首尾相應有以待敵衆心乃安爲今之計無以易此至於機會之來固難預定臣職在守土不得而知也上深然之每以上流諉公議臣欲廢江州軍公力言不可而止公以和好方堅上章求歸移知宣國府便公之私四年改知福州兼本路安撫使海寇爲亂公遣兵捕渠戮之十月得末疾再請洞霄七年遂告老上雖知公疾猶令降詔不允曲示禮意尋特轉通奉大夫許致仕八月二十三日召其子授遺奏大指而薨年六十有三特贈金紫光祿大夫官其後十人積階自迪功郎至三品皆特遷爵鄱陽郡開國公食邑二千三百戶寔封五百戶有司定諡曰莊敏以九年二月乙酉葬邑之南

鄉湘湖長穆山之原娶同邑李氏封榮國夫人後公九月薨子男四人皆通敏樨今爲朝請大夫提舉廣南路市舶梓朝請郎知盱眙軍機通直郎新通判撫州獨其季承奉郎隆興府監倉櫛早世女三人適李師心王源方恬孫男十五人光熙烈勳燧燧燿燿杰原焯焯炬焯炎孫女七人公學本誠敬不專誦說每務躬行嘗從容奏高宗曰臣起家寒遠所以報國惟無私不欺耳及事重華亦云退以名所居二齋天性孝友自以祿不逮親每沾俸賜感愴彌日憐弟澄少孤拊遇尤至首蔭以官前公數月沒淮東公已病猶遣長子暑行護柩歸遺命復官其子與人交始終如一居家儼恪服用猶未貴時治郡不求赫赫名處軍

事精審明白將卒無不悅服尤愛惜爵賞每曰名器輕假何以示勸有立功者必奏真命未嘗假版其後朝廷以諸軍借補猥濫或奪或裁獨所部無之汲引善類惟恐不及名卿才大夫多公所薦有文集二十卷奏議十二卷辭章簡重如其爲人某嘗觀國史天聖中契丹講好已二十餘年宿將無在武備卑缺范文正公方爲京官奏疏乞命大臣舉忠義有謀之人次命武臣舉壯勇出羣之士及復唐武舉當世稱其有王佐才由是入館閣擢右司諫言事鯁挺爲仁宗所知元昊僭竊選帥西邊盡瘁經營昊竟納款召拜二府值西北交爭麟府奏警自請宣撫河東陝西二虜卒不敢動後歷數鎮而終本朝言文武兼資可爲

後世法推以爲首公以文正嘗守鄱陽師慕其爲人故當南北交聘習講又治諱言軍旅之時獨以館職爲國遠慮請擇武將遂結主知中歲徧歷言路出帥荆襄往來指授兩路晏然及亮授首遂參大政重華初元復以執政督視軍馬悉其智謀方面鞏固和戎定而公歸位元樞歷四鎮遭時遇主出處本末大畧近文正然後搢紳間皆知儒者果可用也初公薨翰林學士洪公景廬旣以歷官行事刻之墓嗣子棹謂某與公同朝嘗贊美攢陵之議相與至厚復請碑於墓道義不可辭謹提其要而繫之以銘於是公以諸子升朝累贈至太師銘曰

天生聖人專用仁治蠢茲獫狁常桀以肆念昔三代降漢迄唐

樂天保民運祚以長赫赫高宗紹復大業明明重華廣聲繼伐
叛則征之服則盟之宜抑爾兵毋殘我民維時汪公致位丞輔
翼贊兩朝敵威衆附雜耕潤上屯田先零氣吞幽燕公志則然
我車旣攻我策旣定師干一試簞壺必應有黠斯寇竊窺至仁
叩關乞和遂許來庭上曰歸哉其永予弼公曰止哉盍均於佚
征鎮四遷訖其外庸或出或入有始有終孰不富貴孰不更踐
有譽無疵如公則鮮往在慶厯西征夏臺倚臣曰范迄用招徠
於穆二聖心乎仁祖公慕先正幾踵其武螭首龜趺表於墓門
文以詩之庸諗後昆

資政殿學士贈通奉大夫胡忠簡公神道碑

紹熙三年

武王一戎衣而定天下應天順人之舉也義士猶或非之孔孟
奚取焉爲萬世計也紹興和戎高皇有不得已者矣兩宮未歸
母后春秋已高故與大臣決策從權中外議論雖洶洶顧無敢
直張本陳於上前者獨樞密院編修官胡公銓上書數百言援

作極

大義而伸之大畧謂王倫誘致金使欲劉豫我秦檜腹心大臣

導陛下爲石晉孫近傅會遂參政事願竿三人頭羈畱金使與
問罪之師時八年十一月也辛亥有旨銓書凶悖劫持其削籍
流昭州仍降詔布告中外是日檜近惶恐待罪明日又請收責
命不許則乞從未減十二月王倫亦再上章自劾而六曹長貳
給舍臺諫自晏景初而下多有救解者乃改監廣州都鹽倉明

年正月宰執復奏銓書專詆臣等前和議未諧不敢固請以疑
羣心今議已定宜稍甄叙乙酉遂改簽書威武軍節度判官廳
公事十一年六月之官十二年七月諫議大夫羅汝楫劾公益
倡前說用欺羣聽復除其名勒停編管新州十八年十一月郡
守張棣奏公與客唱酬毀謗怨望移吉陽軍時大臣專國柄小
人觀望迎合必欲置公死地賴天子獨保全之二十五年冬秦
丞相薨乃得歸某竊惟人臣犯顏逆耳上撓人主之怒下爲權
臣切齒或誅或斥何可勝數未有九重特申詔諭兩張本作二府矯
情屢請禁近引誼救止曾不四旬謫命三改如朝廷此舉之盛
者當是時一胡編修名震天下勇者服怯者奮朝士陳剛中以

言錢行至云屈膝請和廟堂無策張膽論事樞庭有人貶令安
遠之死靡憾鄉人王廷珪嘗賦姦諛膽落之詩竄徙夜郎反以
爲榮下至武夫悍卒遐方裔士莫不傳誦其書樂道其姓氏爭
願識面雖北庭亦因是知中國之不可輕蓋天理所存自公達
之人心所憤自公發之扶世垂教非聖朝之伯夷耶孔孟如在
其大書特書也必矣胡氏本金陵人五季徙廬陵公字邦衡曾
祖連妣康氏劉氏祖愷贈承務郎妣孺人張氏父載有氣節一
試有司不中卽棄去贈大中大夫母陳氏張氏所生母曾氏俱
贈淑人公幼不羣強記博覽年二十試大學文不加點建炎二
年廷對行在所考官初以冠多士或畏其切直置第五授左文

林郎撫州軍事判官未上隆祐太后避狄上贛狄師隨之公以發運司檄攝本州幕官率鄉丁佐官軍并止第賞循承直郎就權判官尋丁父憂服除與兄鑄從鄉先生蕭楚講春秋學無任進意紹興五年張忠獻公都督諸路軍馬辟湖北常平茶鹽司幹辦公事以親嫌易河南提點刑獄司俱未行召赴都堂審察七年兵部尙書呂祉以賢良方正薦四月賜對改左通直郎留爲樞屬後二年赴福州纔一年踰嶠又六年過海守隸驅公使步往又諭送吏侵公公不爲動吏無所肆其毒旣抵珠崖著書怡然不以死生介意士執經從學多可觀預貢者相繼赴南宮其後公還朝復請五至省者許勿限年推恩自是海島頗有仕宦

者閱七年始量移衡州又數年乃許自便三十二年壽皇卽位復左奉議郎知饒州十二月入對乞修德結民心練兵觀敵衅上曰久聞卿直諒拜吏部尙書左郎官隆興元年正月遷秘書少監四月擢起居郎兼侍講國史編修官論記注不應進彙前後殿皆當侍立遇直前毋白閣門毋隔班次又請移都金陵時督府北伐克宿州大將李顯忠邵宏淵敗歸勸上毋以小畝自沮七年旱蝗星變求直言公請勿徼福佛老躬行周宣王故事罰監司守令之貪殘者其論納諫曰今廷臣以箝默爲賢容悅爲忠反謂臺諫論事爲賣直此德宗疑姜公輔之語也馴致興元之幸所謂一言喪邦者上曰非卿不聞此金人再求和公曰

彼知陛下銳意恢復故以甘言詭計欺我願絕口不言和字上嘆其忠直侍郎王之望侍御史尹穡皆主和排張忠獻公公廷責之間者稱快兼權中書舍人特升同修國史公雖與忠獻善及其子棫賜金紫則謂不當如待勲臣子繳奏之太上皇后改稱教旨爲聖旨公奏大哉乾元至哉坤元今乃一之將如太上皇帝何上曰奉親之過朕當自受十一月詔以和戎利病遣使可否禮文後先土疆取予大要詢禁近或勸公從衆公奮曰古有斷頭將軍無降將軍乃上奏曰京師失守自耿南仲主和靖康播遷自何桌主和維揚失守自汪伯彥黃潛善主和完顏亮之變自秦檜主和議者乃曰外雖和內不忘戰此又向來權臣

誤國之言也一溺於和將士解體尙能戰乎執政讀之失色會中貴人推金字牌賞越舊制公索成法將論之俄與宗正少卿何備兩易其官公未出省吏白新舍人至公叱曰命汝取成法何遲也吏懼探懷出之公亟具奏乃緘印上馬去上尋悟中傷之由請外弗聽獨以侍講夜對上曰金急欲和其勢甚蹙公乞力任張浚恢復可必因再求去上曰卿直諫四海所知且留經筵事無大小皆以告朕二年二月兼權國子祭酒六月除權兵部侍郎八月上以災異避殿減膳詔廷臣言闕政急務公以賑恤爲先務議和爲缺失於是大學生七十七人同上書乞再相陳康伯用胡某爲腹心進兼侍讀金人議國書未合或請末節

不必較公曰富弼以死爭獻納二字今欲君父卑辭下敵國愧弼多矣上韙其言十一月以邊事改卜郊公言不可者十又大臣主和益堅公爭之力以本職措置浙西淮東海道命下卽趣行時金寇深入號八十萬淮東郡縣望風退避高郵守陳敏拒之射陽湖而六將李寶駐師江陰不肯援敏公檄寶出師寶先嘗取密詔爲自安計公劾奏曰臣受詔令范榮備淮李寶備江緩急更相援今寶視敏弗救若射陽失守大事去矣寶懼與敏犄角退金兵時大雪河凍公親勵冰濟舟師人以用命初公與尹穡同出使穡使浙東置家於京公使江淮蓋受敵之地攜孥北行實安衆心言者乃併指爲罪閏十一月與穡俱罷久之提

舉江州太平興國宮乾道五年冬上語諫臣單時思得節誼之士時奏公中興初率鄉兵邊金事上雅知公陳虞二丞相復薦之遂除集英殿修撰知漳州未赴六年春改泉州趣令奏事上曰每思卿直諫今朕恢復之志已決公曰陛下嘗欲移蹕金陵何爲中輟上曰以民之不易少需耳畱爲在京宮觀兼侍講閏五月除權工部侍郎論前修史功進官一等十一月真拜侍郎公言初元經筵七人老臣獨在願乞身歸田里上曰卿忠孝神物護持且畱觀朕恢復同載大梁或忌公敢言摘細故雜他朝士併撼公冀不得獨畱公自以年踰七十遂求致仕詔除寶文閣待制在外宮觀七年三月也未數日特畱提舉祐神觀侍講

如故上曰卿大節可嘉朕不忍令卿去未幾受詔舉堪任刑獄錢穀及智畧吏能各二人言者又謂公所舉非其人貶秩二等公知不容力求退進敷文閣直學士再提舉興國宮特許陛辭公奏願陛下任賢斥邪理財訓兵逮鯨恤孤必報國仇必歸陵寢必復故疆上曰朕志也又問卿今何歸公曰臣向在嶺海嘗訓傳諸經今歸廬陵將成此書特賜通天犀帶以寵之公既歸上趣所進書遂上易春秋二禮解詔藏秘書省尋復原官淳熙二年上思公不置諭大臣令進職初擬稍遷上特升十等遂爲龍圖閣學士前此未有也太上慶七十獨公以前朝龍飛甲科遷朝奉郎祠滿又納祿上令因任近臣有言秦檜時臣僚被貶

斥者後皆還其所歷歲月惟胡某爲議郎將四十年未嘗自列詔特予四官遂轉朝散大夫三年冬三納祿優詔不允四年秋秩滿特命提舉隆興府玉隆萬壽宮五年夏上以公連歲納祿舉大梁同載之言諭大臣使畱公仍進端明殿學士六年冬三省復奏公祠滿上曰銓雖老不衰昨去國欲他日從朕中原朕嘗壯其言可召歸處以經筵公引疾力辭因陳時病五事且曰劉珙張栻將死其言甚忠李椿鄭鑑之去國論議皆有補陛下盍念之顧何以老臣爲上知公不能來七年春超轉朝議大夫再食興國宮祿公稱疾篤四月加資政殿學士致仕五月庚辰薨遣表猶欲爲厲鬼殺賊贈通議大夫官其後三人享年七十

有九初封廬陵縣開國男加至本郡開國侯食邑自三百戶積至一千五百戶實封百戶是年冬十月丙午葬於縣之儒行鄉松山原祖塋之右以子升朝遇郊恩贈通奉大夫娶劉氏中散大夫湖南提點刑獄事敏材女先公卒贈淑人五男泳承務郎監江淮總領所惠民局兼行宮雜賣場淳熙初卒官漕今爲奉議郎前沿海制置司幹辦公事賜緋魚袋能世其家浹承務郎鴻承奉郎冲未命天五女適從事郎道州司法參軍嚴萬金福唐葉昌嗣上饒方自厚通直郎簽書昭信軍節度判官廳公事賜緋魚袋王宗孟將仕郎王歲孫男十六人槻承事郎奏辟廣南西路轉運司主管文字築文林郎監泉州市舶務杙承奉郎

程杙楷榭枿機梘檣杓樺檣櫂椅女七人惟公忘身爲國首倡正議人已知敬畏又平居持論鯁挺視權貴有不善趨向有不正輒奮髯欲扼其吭畧無顧避士大夫以是疑公特立獨行不可得而親其實篤厚恭寬孜孜樂善常欲以學道愛人之實施諸有政旣不大用於朝嘗三拜二千石復未及布宣於外故公之剛雖表表愈顯而其仁心則罕知者昔蘇文忠公作剛說謂夫子以剛毅巧言辨仁不仁深闢大剛則折之說由公視之其信而有證哉公性孝友在海南聞母喪慟絕水漿不入口一夕鬚髮盡白當任子先祿兄之子歲時會聚宗族恩意周備收恤貧弱不計家之有無與朋友交情文兩盡田父野老羸兒牧夫

亦接以禮得其懽心奉身儉約非賓祭食不重味間被君賜可
辭則辭不可辭則以調人先疇外寸地無所增識者嘆服公聰
明既絕人又能堅忍勤苦聖經賢傳晝夜繹思古文奇字悉力
研究發爲文章雄深雅健清新藻麗下筆輒數百言尤刻意詩
騷用事深遠措詞奇崛後生投贄率次韻以酬多至百韻數十
篇愈出愈工字畫端勁兼通篆隸碑版一出人爭傳玩遠於禮
學能躬行之冠婚喪祭必遵古訓釋老異端一切屏棄親舊慶
弔寒暑不輟自壯至老始終如一在新興名室曰澹晚號澹菴
老人遂以名其集總一百卷又著易拾遺十卷書解四卷春秋
集善三十卷周官解十二卷禮記解三十卷經筵二禮講義一

卷奏議三卷學禮編三卷詩話二卷活國本草三卷自公之歿
其子以門人今秘書監楊公萬里所狀行實來求銘某自少知
慕公名德隆興初先後入兩省中間郊居從游幾十年已復遞
宿玉堂凡公文行皆親薰而炙之銘其敢辭獨念公官品雖未
應謚而名節如此顧在隱德邱園之下耶幸從執政之後當任
斯責暨尸宰事始奉明詔謚公忠簡而郡庠又以公配祠六一
先生然後哀榮兩備銘公有辭矣銘曰

河入中國地卑而傾屹立砥柱其勢乃分江會三峽湍束於隘
截然濫瀆其流乃殺天方驕金帝維念親事之至難有君無臣
斷斷滿朝其瀾孰障言言胡公正論獨抗鼎鑊刀鋸視之猶無

嶺海崎嶇不日夷途相欲殺公彼儉趨和天子仁聖公卒無禍
晚儀王朝素志弗移不會於梁則繫乎時富貴壽考百年之頃
振忠大節千古惟永懦夫以立清哉伯夷孔孟亟稱公乎得師
祠在學校傳在國史刻詩新阡與宋無止

省齋文彙卷三十終

省齋文彙卷第三十一

廬陵周益國文忠公集三十一

邑後學歐陽棨介卿重刊

墓誌銘

右迪功郎致仕劉公

若川墓誌銘 乾道元年

隆興元年十二月一日廬陵鄉先生劉公卒州學教授師生員
哭其家甚哀郡人皆嘆曰善人死矣於是門生鄉貢進士田亮
功會萃遺事屬某為之銘某之兄弟昔以童子受業公門其可
以辭公舊名武字定功後改名若川字朝宗世為廬陵人曾祖
海祖惟一皆不仕父陶字紹先博學有聲稱於勢利泊如也其
詳見文人葛敏修季聖功所為銘紹先娶樂氏實生公公自幼

刻意讀書事父母盡孝待兄弟以順方三舍法行爲正若錄必經術行誼俱優者當是時公固未老人已曰非劉公不可其後改科取士人又曰劉公元祐宿學也宜留爲吾徒師中間預鄉薦可以仕矣公優游學舍不起也諸生亦謂公言行可法挽之相與張本作相與挽之不置蓋贊助學官表帥多士踰四十年平居與物無競休休然真寬厚長者人以是敬愛之若乃施口惠任心術以沽流俗之譽者固公所恥也家素貧學者聞其名自遠麋至賴以自給公損衣節食推其餘以字育孤幼賙恤朋友此又人所難者紹興二十九年太上皇帝慶壽於慈寧宮凡高年以差賜爵時公年八十七且有子舉於鄉實應詔書遂補右迪功

郎致仕初公屢求解學職眾輒留之至是欲必去眾曰公耳目尙聰明况養老於學古之遺制也不聽蓋復留四年以疾卒於家公爲文醇正淡泊如其爲人有集二十卷初娶夏侯氏再娶王氏彭氏四子長充實通經篤行有父風次充國鄉貢進士次待問以毀卒次定國二女長適進士彭邦直次適進士王景先前卒孫男女俱九人男鄉貢進士羲之暨麟之釋之涓元之揮儀之宗之必勝也會孫男三人伯雄伯魚伯鳳皆業儒女二人議者謂公豐積而嗇取後世殆其昌乎諸孤以二年閏十一月辛酉葬公於城西雞家嶺與彭氏同兆而異穴銘曰

九十一年不其壽子孫濟濟昌乃後天豈我私躬自厚如唐師

德漢少游無競無求以白首附郭之山長而秀公歸其宮安且久列辭鑽石耀不朽

蔡子亨墓誌銘 乾道元年

伯父沅陵公好賢喜士其規模宜與時利相反一時巨室眾方慕嚮有來請交多捨去不顧卽故家若寒士人所蹈藉者往往察其賢延譽之仕以故弗甚顯然世言善擇交者人人推周使君紹興丙寅春道袁州問州之士大夫孰可與游皆曰蔡君子亨故相家也築室砲沙河上葺廢圃爲園日延邦人過客飲酒賦詩鼓琴彈棋於其中蓋二十年未嘗見過失是何如伯父曰可也立命過蔡君蔡君出迎貌溫而恭論辨而無邪視其家庭

蕭然閱其子弟翼翼怡怡爭讀書學文伯父喜曰人言果可信時方求介婦會蔡君亦擇壻一言而兩家通婚姻如東阡北陌也歸道所以然予年尙少竊記之自是從事四方絕不與子亨相聞隆興改元秋七月歸廬陵客有斬衰偕謁入者視之乃子亨之子岳也予驚問來故則哭曰今年先人棄諸孤雖葬而墓碣未刻猶不葬也岳爲是不敢顧凡筵扶服亟來惟執事哀許予辭謝累月岳泣請益虔予兄又提筆迫曰趣爲我具藁乃取左從政郎吉州司法叅軍魏吉甫所狀世閥行事而比次於下君名衢子亨字也興化軍仙遊人曾祖準贈太師秦楚國公祖京太師魯國公父儵贈少保諡文簡母永宜郡夫人强氏幼以

門功補承奉郎轉承事郎嘗贈金紫除太府丞改直秘閣君父母皆早世能自立不爲貴驕氣習在政宣間公私事一無預知故官以例遷未嘗超拜及舉族落南有司獨刊去君名則其始末可概見矣始虜之入大梁也士民挺身避難君能冒死走父母殯宮取柩南奔其後羣從有困窮死亡者君悉爲賙給蓋藏之平生孝友類此死時年五十八時正月己酉也葬以四月壬申墓在州之西平田娶洛陽王氏惠獻公化基之曾孫生四男魯岳岡密魯密前死四女長壻右文林郎武安軍節度推官王注次則予兄右迪功郎監潭州南嶽廟必端次進士張伯虎其一旣嫁復歸孫男三人垓埏埴女三人尙幼銘曰

家鼎盛或端靖名必振廢而居誰爾諛乃有譽銘君墓是之取尙無斃

徽猷閣待制宋公喚墓誌銘 乾道二年

公諱喚字景晉姓宋氏其先北州大族後徙開封府祥符縣至公之曾祖鄭國元憲公庠以道德文章厯踐樞宰賜第咸宜坊官至司空薨贈太師中書令兼尙書令曾祖妣魯國太夫人胡氏祖均國朝散郎致仕累贈金紫光祿大夫祖妣大寧郡夫人陳氏父密年朝請大夫致仕累贈銀青光祿大夫妣同安郡夫人張氏安康郡夫人呂氏公弱冠補太學生嘗升舍會父致仕當補官公友愛其弟推與之政和四年別以門蔭爲將仕郎調

孟州刑掾改河北糴便司幹當公事選充大晟府修製大樂管
幹文字以生母令人崔氏心喪去官服除用前糴便賞改宣教
郎爲河北轉運司幹當公事提舉洛口交裝催促綱運擢尙書
司門員外郎出爲蔡河撥發宣和元年冬徽宗召對稱旨命知
宿州明年方臘起連陷郡縣數十羽檄調重兵擊之所過騷然
宿爲往來要衝凡軍需獨前期告辦民以不擾久之以治郡最
一路除直秘閣四年夏童貫退師白溝公適入覲帝命乘驛按
之盡得其狀未幾以將作少監召賜緋衣銀魚數條積弊多所
裁革遂長監事賜服金紫六年正月遷殿中少監入謝帝諭以
裁冗濫柅侵漁公悉意奉行一時號爲稱職靖康改元幹離不

深入道君將南幸朝廷議狩襄鄧中外洶洶士大夫潛懷向背
欽宗雅才公擢徽猷閣待制添差江淮荆浙等路制置發運使
實欲調護道君行宮也人謂公且辭行公曰此非臣子効力時
耶以正月三日受命而是夕龍德之駕倉皇出通津門公捐家
貲募兵民擊河凌通御舟遂從道君踰淮渡江是月十五日次
京口時金已破京城道君命所在州止東南遞角及上供綱運
毋令敵得又高俅纔領禁衛三千畱控淮津惟童貫將勝捷兵
三千實從會一浙勤王兵三千人過鎮江道君命畱之疊三事
而疑似之言寢聞於是有上書天子乞斬童貫等六人者二十
入日詔聶山爲發運使代公密圖之而與在京差遣山行有日

尙書右丞李綱言於帝曰斥貫等一詔書足矣投鼠不可不忌
器帝曰朕意亦然罷山不遣而公以二月末至闕帝召對首問
道君安否公敷奏詳明帝喜曰流俗紛紛朕皆不信也明日復
召至延和殿授使指令奉書行宮公頓首曰臣備數從官蒙任
使敢辭難乎顧愚戇不能道兩宮之情死無以塞責帝曰朕自
道君在外寢食不安彼小人何知動輒猜間不可不慮卿頃嘗
將命至春坊又久在禁省吾父子知鄉故藉卿一行往矣道此
誠意用釋朕憂公知不可辭卽奏云陛下仁孝天下所共知况
臣親聞玉音敢不竭力帝曰朝廷昨命童貫畱守京師貫輒不
告而去名爲扈從實遁耳議者屢請誅之朕以其在道君左右

第貶池州卿爲我奏遣毋令舉朝尙以爲言也公曰謹奉詔乃
三月四日再除公發運使填高衛闕暨明日入辭帝曰更有一
事黏罕再犯澤潞朕以道君未歸屈已懇和須其退師卽遣奉
迎使詣行宮問歸期不然遊騎脫復渡河豈不驚動君父公曰
聖慮及此可與天通非羣臣所能及也帝目宦者取書起立授
公公退卽疾馳不三日至符離俄報云道君入虹境矣公率官
吏迎拜河上道君召公登善濟舟公進書備道上意道君憾然
曰此因流言致朝廷相形迹監司州縣觀望風指往往忘分慢
職因條舉數十事每及一事卽泣下云云公曰方都城晝閉中
外隔絕雖御前號令州縣或不奉承非獨行宮也守令之罪蓋

不容誅朝廷何預焉道君意乃解公即奏臣出京師時聞童貫貶池州今猶未行何也道君曰勝捷兵隸貫未知所付公以便宜奏云若付宇文粹中而以范訥爲副宜可道君曰善召二人使交兵明日道君語公童貫得勝捷軍情驟罷之且生變奈何公曰貫平日敗壞軍政西北之人怨入骨髓今斥去乃所以安眾生變之語殆貫自解耳道君趣貫行一日道君復語公內禪自出我意雖皇后亦不與知况羣臣皆欲保家族敢與此耶我纔出門姦人便欲貪功離間是無天也再及遞角等三事泫然曰我爲國家過計爾得毋以此致疑乎公曰臣造朝纔數日無日不召見主上誠孝由衷思慕形於言色雖百小人進間言決

不能入若廷臣則陛下何恤道君曰帝知我急歸否公曰主上正以黏罕在澤潞故願陛下少畱京口以待奉迎使與儀物偕來臣固疑迴鑾太遽而未敢啟也道君曰兩日待說偶未暇只爲無裏糧住得耳公驚曰臣雖被召去自有淮浙兩路漕臣及發運使副在揚潤顧不能應辦耶道君曰有一文字待付卿令左右取匣中文書來公跪讀之乃尙書省付知宿州林箎劄子也初州有御前竹石錢十萬緡道君過州時親筆付箎取其半箎纔輸二十之一而以其事上尙書省尙書符宿州其以錢上京毋擅用後題正月十三日日下獨執政官一人簽書公讀畢奏曰陛下在位久凡御札寶批及三省批旨若畫可畫聞

張本作畫

否有不作奉聖旨付外者否道君曰無之公指堂帖曰此既無聖旨二字又未嘗徧書宰執非朝廷意甚明殆圍城中小吏作常程行遣而當筆者不察爾臣非敢游說以寬聖慮也道君視之欣然曰卿言是我未思此公隨事解釋大率類此行宮次南京公以帝命請先入奏道君乃以書授公且賜手詔一通大畧謂嗣聖遣宋某齋書至遂得通父子之情話言委曲坦然明白由是兩宮無纖毫憂疑至以公比張仲孝友公再拜跪受訖夜以小舟馳去比至虹橋宣召者踵來公奔至崇政殿門謁者云上畱宰執待君已有旨免朝見止常起居可也公及階帝已起立連問道君遽歸意公不敢隱裏糧語繼以堂帖進呈且具道

所以解釋道君者帝悅曰卿應對甚善當議褒賞公曰臣將命無功免責爲幸賞非敢冀也還部未幾臣僚劾公奏宿州事爲脅持離間而大臣獨畱劄子者從中助之詔落職與在外宮祠言者不已七月再貶單州團練副使永州安置紹興元年復朝請大夫次年始得提舉亳州明道宮凡歷八任改提舉江州太平興國宮積官右朝議大夫二十七年光堯壽聖太上皇帝眷懷舊事命取徽宗所賜手詔以入親爲製題記數百言宣示百僚襲藏敷文閣又下詔暴公之忠還其舊職歲賜藥石眷待甚厚惜公已老無意於仕矣後四年遂納祿轉右中奉大夫是年六月二十日終於正寢實紹興三十一年享年七十有六訃聞

贈右通奉大夫賻黃金百兩錄其孫三人制詞有學知守其家材實裕於用被遇徽廟竭誠靖康謨訓具存忠勤可驗之語然則公蘊蓄雖不盡施於世亦可無憾矣公事親孝接物誠出於天性非勉強而然幼篤志問學稍長多識名士其聞見議論皆有根柢晚築室章江上益以文史翰墨自娛故士大夫樂從之游坐客常滿公待之無戚疏夷險一與竭盡雖遇橫逆不校也先娶李氏再娶張氏皆追封令人二男子奇右從事郎早卒仲甫孝謹儒雅今右承務郎充江南西口路提舉常平茶鹽司幹辦公事二女適進士呂溥之右從事郎李耆碩孫男三人文饒文翁文成女適右修職郎劉泌鄉貢進士魏好信餘尚幼曾孫

曾老巖老女一人仲甫以是年九月二十七日葬公於洪州新建縣桃花鄉西山麓珠陵陂岡之原使來求銘惟我先夫人宋之自出某爲兒童已識公每聞其道靖康間事皆可書而誦也其後入史院爲編修官以諸家所上太史書叅考公言無不合者故於論次特詳焉夫其大節詳矣他固不嫌於畧也銘曰
泰寧之世士趨寵榮一蹈時艱則謀其身其身是謀國於何恤君臣父子秦越肥瘠有美宋公相門之英騫翔禁密曰惟才臣平居涖官稱職而已逢辰之虞惟上是使靖康岌岌外獬內訌不愛其躬調護彌縫我惟忠臣張本作忠君爾覆醜正眾言淆亂盍折諸聖聖有一言萬世不疑巍巍三朝先後同辭祐陵紀之欽

廟倚之明明紹興又增美之孰不忠孝孰晦而顯天亦者之式燕爾晚保有令名言歸茲藏載祀邈綿毋或壞傷

子柔弟墓誌銘

乾道二年

亡弟子柔仁而剛敬而和敏而篤學幼事母孝長從兄順與人交忠信廉遜其存心主於厚而自期甚遠其容貌美秀悖實善觀人者與談五行者負風鑒者皆曰是必貴且壽然年止三十三再與計偕而已嗚呼非君不幸予之不幸門戶之不幸也初紹興庚辰春予官學省君以七月自吳門來道得小疾相見時輒爲訣語八月寢劇十一日神識湛然而逝後六年當乾道丙戌十二月二十八日予自上饒改葬先夫人於吉州廬陵縣膏

澤鄉長岡之麓乃耐君柩於兆域後五十步成君志也周氏世鄭人徙吉三世矣曾祖中奉大夫諱某祖左大中大夫諱某者左朝請郎太學博士諱某先夫人姓王氏君既歿哀遺草得詩文三卷語皆驚人使少假之年必將追騷人而與遊望聖門而力造肯訖是耶君名必強子柔字也娶濟南韓氏無子予旣求宗姓繼續其祀又哭之以辭曰

嗚呼子柔今安之乎英氣凜然戢於斯乎惟顏回短命兮聖不幸而嗟咨如鄧攸乃無子兮信天道之難知彼一而君二兮雖塗之人猶涕洟况手足之痛兮慘猶甚於屠割已而已而九原不可作兮誰知我悲

文士慶墓誌銘 乾道三年

文生安國將葬其父士慶泣而請曰安國不天遭罹大難今歸窆有期敢乞銘於執事其幸賜之昔我世父辰陽公卜兆廬陵族葬諸喪之在江南者生首挾錦囊之術來相大事其宣力甚至義不可以弗從也乃以士慶之行詢於閩里皆曰其持身愿其濟人勇聞世有浮圖法者謂齋戒所以爲善施予所以植福於是終身行之旣得疾預知亡日告違於常所來往屬纊不亂已而赴弔者咸重惜其死噫亦可以爲此鄉之善人矣士慶字善積世居吉州廬陵縣之永和鎮享年六十有四娶劉生二男一女惟安國存焉其終以紹興壬申十月癸亥而以是歲十一月

月丁酉葬於鎮東金鳳山陽田之原銘曰

生有以養死有以葬壽不至於天而祀不至於曠又何快乎

靖州太守吳君 順之墓誌銘 乾道四年

公諱順之字伯思其先建安人曾祖太常丞方天聖中與兄正肅公有育及京俱以文章稱同年登進士第歐陽文忠公所謂吳氏兄弟名聞天下者也正肅以才猷議論被遇仁宗入叅大政出殿藩輔而弟正憲公充又以嘉謀直道相裕陵遂爲宋大家惟奉常位不滿德累贈金紫光祿大夫正肅旣從其皇考葬鄭州正憲亦葬開封於是建安之吳多占籍北方而公爲雒陽人也會祖母隴西郡夫人李氏祖安行左朝議大夫祖母恭人陳

氏父似耀州三原縣丞累贈右銀青光祿大夫母武陵郡夫人程氏公初以祖蔭補太廟齋郎政和二年爲將仕郎鳳州河池縣尉歷監楚州在城清酒務用舉者陞從政郎宿州刑曹掾吏誤入民死罪公讞正之改宣義郎知醴州武功縣未赴徙宿州司士曹事欽宗登極轉宣教郎賜服朱銀靖康初添差徽猷閣待制朱喚爲江淮發運使辟公幹辦公事俄省員罷遷通直郎建炎覃恩轉奉議郎選知福州侯官縣中原方拏兵盜亦起劍建間軍需急甚公應辦如無事時轉運判官魯詹等列薦於朝進承議郎以寵之州歲賦荔枝擾民又公帑取物無藝公曰邑困矣願少裁其數守帥不樂公遽請祠得主管江州太平觀紹

興詔書求人材前宰相李公綱汪公伯彥皆薦公擢知海州改連州姦毗鄧禮聚眾剽掠湖廣久之就降號義丁禮仍統之常桀以肆官吏無敢究切公取尤暴戾者磔於市餘帖畏服連故多坑冶旁郡上供銀率取給焉歲久負繁民破產莫能充公力請蠲其半免符下吏民抃躍繪像以祠秩滿主管台州崇道觀尋知汀州境素多盜戍兵驕不可倚公擇郡卒千餘晝夜閱習未幾皆可用盜以不作郊恩賜三品服於是自承議郎積功次五遷至右朝散大夫去爲邵武軍遂以右朝請大夫再知汀州未上復主管崇道觀起知復州移靖州州本夷境一語不酬輒白刃相向謂之仇殺甚則合黨羣起謂之結鬪欸異時守皆

武臣文法闢畧公初以文臣臨之下車語寮屬曰蠻夷荒忽不威制則玩不靜治則擾乃大修城池集禁卒教以挽強徐召其酋長戒曰安爾巢穴毋犯省地犯且誅爾亦命守城寨吏彼不生亂毋擾彼矣先是數十年間有崖頭蠻數相仇殺畏公威不敢動羈縻州有相率請輸丁米如近地徭人且歲時貢獻於朝者或謂是可通蜀道宜納之公笑曰守邊莫如安靜吾老矣豈紛紜以求進哉期年公知疆場旣寧則增闢學舍以道藝進諸生卽城東葺社稷壇凡可以化其民者未嘗鄙夷之風俗浸燠矣代還卜居筠州隆興元年八月甲戌以疾卒享年七十有六是歲十月乙酉葬於隆興府新建縣洪崖鄉招賢村之原公生

名家通經力學早自植立性極孝友朝議公疾躬治藥餌不斯須去左右逮其卒欲以適孫解官行服仲父禮却之公曰祖喪從厚不亦可乎自言河南府竟如劉輝故事後當任子推以與姪若姪孫平居待人一以寬恕及在官遇事則果敢能斷省訟牒決疑獄吏服其精敏然聲色未嘗厲也持己尤廉潔公家財無絲髮妄用善鈎校隱欺故所至不加賦而用足厯守數郡雖無赫赫名去必見思在仕途久年除次補不務速化一其初終有譽無瑕可謂難也已初配宜人陳氏翰林學士釋之孫前五十七年卒再娶宜人雷氏國初名臣德驥之後前十年卒至是合葬招賢二子藹右文林郎蔚右從事郎皆好學有吏能一女

適右從政郎梁敞孫男二人千乘千秋俱將仕郎女二人長適右迪功郎朱時中次未行昔我亡姑實歸文林君故來請銘乃為銘曰

猗與吳公園外而方中強其志而與其容人徑而逢已緩而從不阨於窮不極於通以卒其功以壽其躬猗與吳公可謂有終

省齋文彙卷三十一終

省齋文彙卷三十二

周益國文忠公集三十二

邑後學歐陽棨介卿重刊

墓誌銘

○ 文林郎劉君

令猷

墓誌銘

乾道六年秋

紹興辛未春廬陵郡貢士對策集英者四人予與辰告劉君齒齊而志合相好也既唱第予注徽掾君亦得尉外邑將同寮焉未幾予易中都官而君丁外艱或離或合率數歲一見隆興改元予自左掖奉祠歸君方築室治園圃教侍女吹竹彈絲以娛太夫人予數過之相得益歡乾道三年君去佐武陵幕予計日需其歸五年冬乃聞君遭母喪纔浹旬以毀卒予哭之慟明年

春諸孤持道州永明縣主簿彭恪狀來請銘予方以使聞奏事未暇作也秋八月書來告曰塋期迫矣幸賜之銘噫尚忍銘吾亡友也夫君諱合猷辰告字也其先自金陵徙家吉之泰和縣曾祖紹不仕祖及甫贈右宣教郎考諱解左承議郎通判德慶府號通明吏其卒也待讀胡先生爲誌其墓母歐陽氏君少穎悟年十四別駕公令東流君一試池校輒魁諸生自是益刻意問學文采日新初別駕年二十五由鄉舉登科君亦如之歸拜二親里閭嘉歎調婺源尉不克赴主贛州興國簿吏以例齎銀若干來迓君曰例可承耶却之或曰如他人何君悟曰簿解寓僧坊三十年盍斥賣爲土木費乎役遂以成後人賴之邑合同

里劉公子昂健決能治劇得君大喜相與通譜系君悉心佐之政遂爲一路最秩滿循左文林郎調常德府觀察推官一府咨賴他郡有疑事部使者必付君平決無不中理諸公交薦之湖北控川峽岸洞庭連辰沅號險阻荒絕沿檄者率規免惟君未嘗辭奔走殆無宦歲竟以此病然猶自力恐貽親憂會太夫人卒君病遂劇以十一月十八日亦卒享年四十四歸葬於廬陵縣連山桐木岡元配易氏祔實六年十月二十六日也君再娶曹氏慈聖光獻皇后曾姪孫易夫人生五男召孫于孫宜孫耆孫吉孫皆力學有父風孫男女各二人君天資孝友心計精密別駕生平樂施喜客家無餘資君未冠幹蠱已有聞盡質婦財

易良田約用而豐施以養父之志父歿庶弟諸妹婚姻無失時者經紀贅婿家使其幼稚有立常產不隳人皆義之姻黨有獄吏卒方圍捕親屬駭散君奮身當其門眾帖帖無敢暴家皆以全其急病好義大率類此嘗考試宜春江陵解進士郭昌明彭大年商剛中高岑明年皆擢第兩邦稱為知人嗚呼君有絕人之才宜為世用而賦命止此予既悲而憐之且自愧昔者不能推賢揚善負朋友之責也故追叙情好而系之以銘曰

嗟維君才且良

張本作才具長

富術業耀辭章如用我何不臧劍發劔

折其剛彼蒼天命靡常尙無憾嗣方昌

○ 左朝請大夫魯公魯墓誌銘 乾道七年

近世有儒學起家銳意功名之士曰魯公如晦官雖不大顯於時而姓名藉藉班列中始予自金陵入朝以婦家有連相好也會完顏亮將渝盟公日詣丞相府論天下事纏纏不止諸公雖知其才而不能用常以是惜之其後予歸廬陵絕不相聞者累年會公弟季欽奉使江西予問如晦今何如季欽曰吾兄宦遊不遂退居里中無意世事矣暨予還朝則聞公屬疾未幾季欽遂以其訃來且狀家閭行事使之銘義不可辭公諱魯如晦字也其先秀州嘉興人徙海鹽之武原曾祖延厚祖惟辨辨隱居不仕父壽宣任右奉議郎贈右通奉大夫生六子各教以學長詹登第崇宣間終樞密院檢詳

張本作檢討

諸房文字公少尤刻苦紹

興五年與季欽同登進士第自是魯氏子弟競勸舉於鄉者歲增多公初調建康府溧水縣主簿帥葉公夢得材之命行江寧縣事百里以治葉公儒先吏師與公論文計事率至夜分其親厚如此俄丁外艱服除爲淮西江東總領所幹辦公事分司池陽邊烽初息軍費冗濫公檢柅其姦歲省不貲魏公良臣出守一見歡若平生遂通婚姻用薦者陞左從政郎徙淮西茶鹽司幹辦公事兩淮惟置漕臣刑獄常平茶鹽事悉隸焉諸司有疑事輒屬公區處無不中理舒州五邑爭承久不決公爲決之改左宣教郎充通州州學教授主管台州崇道觀起爲淮西安撫司主管機宜文字帥劉綱鳩民兵十餘萬將校數百聲震北方

公贊助爲多綱卒眾將亂公訓曉撫循一軍帖帖敵焚權場邊民洵懼公鎮之以靜人爲按堵入主管官誥院完顏亮旣斃太上視師江滸詔公從行兼領進奏院文書填委整暇若平時上卽位遷大理丞治獄明恕爲時所稱公三仕於淮雅知南北形勢兵將勇怯至是輪對爲上極言之且請擇大將以重兵屯形勝地無事則力不分有事以逸待勞此上策也上深以爲然兼戶部右曹郎官民有詣御史府訴婚田者輒請付公皆得其情上方樂聞忠言詔侍從臺諫各率其屬條具弊事公言風俗未正紀綱未立賞罰未當語甚切至頃之請治郡得池州隆興二年虜金再窺邊趣公赴鎮淮人日夜南渡公竭力招集至者如歸

軍士有得信箭刻虜書云云者公笑曰此姦人規搖眾爾不爲動闔境晏然先是諸郡調丁壯防江擾甚虜金師退公以便宜散遣朝廷咨美仍詔他郡如之清溪出城南水潦泛溢人病於涉唐會昌中刺史李景業始作築大堤於南續長橋於北揭名通遠往來便之歲久浸壞公命增築新堤自城屬齊山延袤數里翼以嘉木醜水爲三道橋跨其上別揭新名迄今以爲利乾道元年江浙大飢上焦勞甚遣使旁午會九華綿山竹生實飢民就食日千數公思有以寬上心具以聞而言者指爲導諛非本意也坐罷郡士民懷公惠政爭挽留不置尋復主管崇道觀起知眞州已而歎曰吾志大而命不副歸與以佚吾老初公築通隱

詩人何卿驥洪翰林邁王端尹十朋王司寇柘皆賦五言以美之至是改曰遂隱自爲之賦客至輒歌呼飲酒間以琴奕酣適竟日素喜釋氏書晚自謂有所悟哀樂得喪泊如也七年十一月六日以疾卒於正寢享年七十有六積官左朝請大夫致仕娶陸氏封宜人前卒四子可簡左承議郎通判舒州可適右迪功郎嚴州司戶叅軍贈右承奉郎皆力學工辭章前卒可輔亦早世可復右迪功郎廣德軍廣德縣主簿濟美垂裕庶其在此二女適左奉議郎樞密院編修官孫雄飛右儒林郎監行在點檢贍軍激賞酒庫所糴場魏仲恭孫男九人珏开羽茲所開弼翼輩女二人適右承事郎周準右迪功郎蔡興文曾孫男三人

之茂之柔之純女四人明年三月壬申葬於湖州歸安縣至孝鄉僊嶺與宜人同兆公性樂易事父母友兄弟根於誠處朋友姻戚間皆得其歡心家範整整子孫率勸飭雍睦尤喜周恤親族鄉黨義之天性嗜書少老如一所論著要以名家者爲師法有文集二十卷漢紀攷異十一卷集皇朝要覽一百卷又嘗進江淮表裏圖上邊防十二事蓋將考古驗今自見於功名惜乎弗遂也哀而系之以銘曰

人患無志不患無位人患不久生功不患不成嗟吾如晦由卽而守仕非不偶踰七望八年非不壽然而志竟鬱於初功弗究其圖已乎已乎其亦命矣夫

鄉貢進士歐陽耿仲

身墓誌銘 乾道元年

歐陽氏族望廬陵而家於永和鎮者尤以儒稱吾友耿仲又永和之卓然者也憶予游場屋時耿仲已嘗舉於鄉與其仲奕叔弁季彛號里中四傑雋敏辨博眾屬目焉日過其居翼翼怡怡有古人風予每語人是家且與其後仲叔相繼早世耿仲復屢抑於南宮遂臥末疾乾道九年二月壬辰竟不起嗚呼予識君兄弟纔二紀襲裘而弔者三今惟季也歸然當門戶命之難謀如此宜不歎以悲乎予扶卜以四月癸酉耐耿仲於鎮東金鳳山祖墓之次銘予責也故不辭耿仲諱身朝散郎通判澶州祭之會孫隱君子璟之孫貢士襄之子少穎悟善屬文袖書謁御

史田公如鰲許以遠器甫冠與計偕益嗜學不倦後進爭從之
往往法其言行有所植立不專爲科舉計也享年五十三平生
喜著述類成五十卷號鳳山集娶陳氏實生扶能世其業三女
適進士曾顯祖吳從義一未行二孫次蘇季蘇女一人銘曰
德焉無瑕學焉無邪亦既振厥華謂將昌其家而止於斯吁其
奈何耶

○清遠縣令鄧君洵侯墓誌銘乾道九年

乾道八年冬清遠縣令鄧君卒葬有日敷文閣直學士胡公大
書官族蓋其墓孤溥復來謁銘予謂得胡公書不朽矣奚以銘
爲溥請益堅乃爲紀初終於下方君諱洵侯字元直世爲吉州

廬陵縣人曾祖河祖注父衍皆業儒母曾氏生四子而君爲季
年十五由縣庠升泮宮試藝日有聞預宣和上舍貢靖康改元
同其兄洵美邦彥涇舟與計偕而涇舟遂中第里人稱焉君既
篤學且練習世故樂善喜爲人師監司守令爭延教子弟家永
和鎮有宅一區負郭田二頃伏臘賓祭有以自足筆耕文績力
也然每上春官輒不利嘗再對策集英殿下再納勅牒而歸今
天子卽位特補將仕郎而君病矣吳興芮公燧賢者也漕嶺表
辟君廣州清遠令瓊帥復召君爲屬皆不果行卒年七十六易
箚猶題詩示子孫初君以十月十九日昧明生其死也月日適
同眾頗異之娶鄉人歐陽元老女有懿行年六十九前君五年

卒葬青石之長岡一男溥也孝而勤於學四女嫁進士邱大章曾尙文餘天孫男三人良臣忠臣正臣女三人葬用九年十二月辛酉其地在縣之膏澤灘頭平相嶺君所自卜也銘曰
試言於廷不潰於成覃慶天飛疾張本作疾窒其亨何志之閔而命之屯尙崇其墳燾後之人

○叔外祖奉議郎王公覺墓誌銘 淳熙二年

公姓王氏其先永嘉軍博野人世業儒曾祖亮中天聖進士第以能守邊易武階至洛苑使贈右武衛將軍祖察少辭任子恩不就韓忠獻王宣撫陝西薦其材而官之終太子左清道率府副卒贈屯衛將軍改中散大夫葬相州之安陽子孫遂爲安陽

人中散長子諱復屢典名郡終供備庫使封文水縣男贈少師次諱後終朝奉郎贈朝散大夫娶杜氏實生公公字天民宣和五年以父任爲將仕郎紹興初補迪功郎昭州司理叅軍以親老不赴六年主洪州南昌簿秩滿丐監西京中嶽廟以便侍養陞右從政郎調福州閩清令聽斷精密吏無敢欺洪水暴至公禱南山水卽退闔境神之去爲豐城縣縣當川陸要衝素號難治令鮮終更者公至則大治會齊述嬰贛城叛王師出征公未嘗秋毫賦民而過者畢給部使者行邑其徒隸以供張去吏請責償守驛者公獨具名物檄取之郡卒持符至怒餉謝不如欲粹吏喧廷下公杖而擊之積二事臺府外稱其正而心弗善也

人往往爲公懼公曰不過不吾薦耳焉能害我終亦無他徙吉州泰和令泰和尤號難治又乘舊政廢弛公剷除蠹弊束縛奸宄聲譽赫然盜自他邑來尉不能拒吏民驚避公自率眾擒之財數月丁內艱而去時二十五年也服除調衡州安仁令三十二年論泰和功改右宣義郎知江州瑞昌縣轉右宣教郎仕姦植良人服其能轉右通直郎賜緋衣銀魚乾道七年通判郴州轉右奉議郎九年主管台州崇道觀淳熙二年六月卒於正寢享年六十有七取宗室女先公二十二年卒贈孺人四男簡壽錢象三女俱未行孫男二人泚澄女二人公天資明敏尤長於吏事使遇盤根錯節攄發游刃必將振耀一世取富貴如拾地

芥而淹屈州縣汨汨以老其命也夫初公葬太宜人於撫州臨川縣靈臺鄉烏龜原遂家臨川遺命卜葬於塋側諸子乃以是歲八月二十四日襄事使來取銘公於先夫人爲從叔凱風寒泉之思其何忍辭銘曰

惟吏之能以公售私用力雖勞人孰汝宜公才敏明而守堅正
寔身之誦不撓其政周旋五邑民允懷之纔佐一州奄其殆而
天賦其能不畀以命嗚呼奈何尙篤餘慶

○承務郎胡君 涿 墓誌銘 淳熙三年

君諱涿字季永吉州廬陵人曾祖愷妣張氏以百歲封孺人祖
載贈朝議大夫妣碩人陳氏張氏父澹菴先生銓以勁節危言

爲國司直雖小夫賤隸椎髻卉服無不知其姓名今爲龍圖閣
學士妣碩人劉氏紹興八年先生自樞掾黜佐福州幕道由姑
蘇而君生故小字蘇郎六歲隨先生謫新州已能背誦春秋詩
人陳元忠試之如流目爲春秋生先生再貶朱崖耶渡海道瓊改
叅知政事李公光在焉見君穎悟許妻以孫自瓊過儋耳拜蘇
文忠遺像於動鏡閣喟然興歎年方一星終人皆異之旣抵朱
崖先生聚徒授業諸生人執一經求訓解君甫弱冠往往與討
論二十六年秦丞相死先生與李公皆內徙初秦氏揭二公及
趙丞相姓名於格天閣趙丞相前薨至是先生賦詩有閣下大
書二姓在海南惟見兩翁還之句君口不絕吟先生曰孺子可

教因授以句法三十一年春侍先生歸廬陵講道家藥死弟怡
怡如也今上登極先生自吏部郎不逾時以左史入詞掖遂爲
兵部侍郎君日從中朝名士游聞見浸博隆興初郊奏補右承
務郎家居累年或勉以仕則曰吾斯之未能信乾道七年先生
固命君類試中之虞丞相邀與相見畧不干以私調監淮西江
東總領所太平惠民局兼監行宮雜買場先是先生得旨進所
解易春秋及二禮君日夜編次讐校先生賴之淳熙元年春君
當之官而不忍去親先生曰吾固欲泛大江游金陵其亟具舟
吾與爾俱君乃迎侍以行留守劉公珙以二府重望少許可獨
禮君厚薦之公車二年秋得寒疾逾月病益侵呻吟皆詩間作

樂府詞旨超詣十一月庚午竟不起得年纔三十八配卽李氏其父孟堅終淮東提舉茶鹽生三子槻榘程又有遺腹君人物爽邁天資孝友幼居母喪如禮事所生母袁氏盡敬學有家法嘗讀橫渠易至心化在熟擊節歎曰至言也請終身誦之雅好吟詠慕陳后山而學焉某蒙先生不鄙間許唱酬君輒用韻見貽語皆驚人蓋天才有過人者充其素蘊必將發聞於世一病而逝可哀也已弟澥瀉及其孤奉先生之命卜以三年夏四月壬辰葬君吉水縣中鵠鄉白蓮塘之原使以妹壻葉昌嗣之狀來請銘某按禮記延陵季子適齊而長子死葬於贏博之間旣葬而封旣封三號遂行孔子曰季子吳之習禮者也蓋言其

在吳爲習禮耳旣而曰季子之於禮其合矣乎是又疑之之詞也周禮以長子爲門子謂將代父當門者也其事重矣昔就其養於所居之官今返其柩於父母之邦若先生者可謂知禮矣
銘曰

木生荆山旣厚其培雨露濡之庶幾條枚飄風振林秀者先折
天乎奈何尙茂來葉

○ 朝散大夫直顯謨閣黃公 石墓誌銘 淳熙四年

公諱石字圯老姓黃氏世爲溫州平陽人曾祖邃祖鬻父理有聲太學贈官至朝奉卽母陳氏贈宜人公幼篤學及長識慮精審喜論國家大利害紹興七年投匭上書言內事可治者七外

事可治者四天子異之下其書給舍皆謂切時可行詔永免文解加賜束帛明年遂中進士第補左迪功郎融州觀察判官未赴改福州州學教授學規業素弛公命正錄而下各舉其職諸生或不告輒出公曰此職事不職也盡罷之聞李葵李楠林之奇爲眾推服卽走其家備禮延致學田相故爲吏乾沒供饋日殷公大加括責歲輸數倍於是增置弟子員優給職事以俸而督其藝業帥左丞葉公夢得賢之薦於朝葉公尋奉祠闔郡郊餞獨顧公曰子且顯其自愛袖出前執政薦章畀公其見器如此秩滿以書抵秦丞相曰上踐祚十九年儲貳未立安危所係孰大於此公獨不開陳乎不報得西外敦宗院宗學教授視事踰

時丁內艱二十二年免喪秦丞相尙當國公申論前事秦曰君謂某向不省耶面舉百餘言而以時未可爲解復得南外宗學教授丁父憂不赴服闋沈丞相秉政公以語秦者語沈沈亦不能用授建康府府學教授而去二十九年留守張忠定公召赴闕公送以書大畧言內則國本未定闔寺寢昵外則北庭懷貳大將乏人國用不給張公咨其美言入對言儲貳尤力適契上意未幾遂行典禮三十一年冬完顏亮死議者爭欲乘機進取會太上皇帝視師金陵公獨陳入事謂宜按甲休兵徐俟其虜變其後諸將果然無功駕還臨安公以銓格改宣教郎選充諸王宮小大學教授主上登極轉奉議郎賜服緋銀乾道元年九月輪

對論二事其一曰舜大治而禹益儆戒無虞成王守成而周公作無逸真宗東封還孫藉上書勸無自滿假召試賜出身今南北始和願陛下以舜禹成王真宗爲心益自戒懼無或暇逸上獎諭云卿言真致治之本其二曰儲君學問當求堯舜禹湯文武之用心不當如書生分晰章句絺繪文詞時莊文太子留意於詩公故及之上大喜曰朕固嘗以此論太子卿言正與朕合退朝以章送東宮且批付中書黃某與陞擢差遣今晚便可擬來遂除校書郎入館不試蓋異恩也十一月進著作佐郎二年省試初擬公點檢試卷上特陞參詳官三月再對力陳正心出治之要上曰卿言不詔旦夕別有委用四月兼權司封郎官十

月爲真仍兼司勳十一月太上聖政書成以公經修進秩一等四年夏三輪對力言陛下爲治雖勤而未得其要且用人當辨才與德其語益剴切十月除樞密院檢詳諸房文字卷十一月改右司員外郎廷尉讞囚有父被毆不死而其子托以復仇殺殺者二人朝議貸死公言父未嘗死而置殺人之罪他日頑民與人有仇導父使鬪從而殺之將不可禁如死者何詔是公議五年八月進左司時公與左相善右相不樂也會蜀人蘇森乞用元祐黨籍恩補官右相欲與之公言紹興六年雖許補官尋以僞冒故八年纔令免解既充前勅矣右相滋不悅公遂引去除直顯謨閣江東轉運副使六年行部值諸郡大水壞太平圩

田公以其事申三省而重於再出擾人亟委官相視賑濟且奏其施設之序三省得初報即取旨差公躬親按視命方下而委官之奏適至時左相已去右相劾公弛慢不親行降兩官罷或勸之辨公曰吾失職獲譴尙何辨聞者韙之六年冬主管台州崇道觀繼復原官九年八月再任崇道觀淳熙二年十二月六日以疾卒享年六十六積官朝散大夫妻宜人王氏某人之女男裳迪功郎新衢州常山尉三女長適林俱次適迪功郎湖州武康縣主簿毛宥季適迪功郎新臨安府司戶叅軍林達己孫男女各一人其子卜以四年十一月壬申葬公某鄉某里貸山休之原使來請銘予謀昔與公分教金陵雅相善故知公爲詳銘曰

金華唐與政名士也知人而善評嘗謂圯老容粹而溫心印而平詞人廣坐語如不出諸口間發一言則辭盡而理明蓋靜而能謀柔而不傾學恥虛文而實用之爲貴論不阿出而君民之爲心若此者可以爲天子之近臣矣嗚呼是爲銘

省齋文彙卷三十一終

癸亥六月初九日於初慶堂

省齋文彙卷第三十三

周益國文忠公集三十三

邑後學歐陽棨介卿重刊

墓誌銘

靖州太守李君

發墓誌銘 淳熙五年

公諱發字秀實吉州吉水縣人曾祖宗應祖復父汝明贈朝散大夫母宜人彭氏初五世祖葬縣之赤石潭卜云子孫百年當有為二千石者大夫一日夢至潭上見巨鯉躍出驚波洶湧震動磯石旁有偉衣冠人笑曰發矣發矣未幾生公因以為名大夫既力學不遇刻意教三子長卓季植公其仲也幼警悟能文十四入郡庠遂貢京師兵興徒步還家已而重臣分鎮諸道客

從者取祿仕如拾芥公遊襄漢夔峽間數以奇策撼將帥獨落
落無所合乃復事科舉年未四十用太學連舉恩特赴集英試
補右迪功郎鼎州司理叅軍時紹興五年也公素號通明加以
精審比三年囚無瘕死部使者言狀特循修職郎去攝邑黃陂
調永州零陵令民稅久不均田在左鄉率籍於右又皆寄產旁
邑謂之僑戶豪民猾吏相表裏賦役病焉令佐課常殿公始至
命設幕兩廡下人未喻公意明日召稅戶若有所訓曉者既畢
集則分寘諸幕使人人自列產幾何稅安在不實聽相糾將根
株連負痛繩以法實則費汝又圍羣胥於獄命吐其實而叅考
焉民與吏倉皇失措懼不相應無敢隱者即日正田三萬五千

餘畝爭訟既絕歲入大增課爲一道最秩滿陞右從政郎多鄉
州永興合境接溪洞民強梗難治公恩威並施罔不畏服諸司
以京秩薦者章二十上改右宣教郎知贛州興國縣丁太夫人
憂免喪通判橫州攝守於賓二十六年詔監司守臣條具便民
事公奏交廣俗誘民男女易翠羽蠻中初猶一夫直十二羽今
僅得其半歲掠賣數百人多烹以祭鬼乞重其禁太上皇帝惻
然從之尋命焚翠羽於行都自是鬻人者息矣轉通直郎二十
八年改知貴州以疾求主管台州崇道觀轉奉議郎明年爲奉
使金國書狀官進秩一等三十年擢知沅州轉朝奉郎今上登
極改靖州轉朝散郎沅靖介獠夷控馭稍不至鴟張蛇結爲害

一方公撫以誠信興崇學校使荒遠悍戾之習浸淫教化咸帖帖無事既合符吏上公履歷於銓部誤書年甲考功以聞有詔貶秩遂致其仕公怡然不以介意日與諸親舊樂飲絲竹歌呼窮晝夜不倦如是者累年年八十有一強健若五六十人與其兄黃髮相對怡怡如也季早世則教育遺孤使有立鄉人服其友愛淳熙改元燈夕會客如平時已而微感疾癸丑遂卒三年十月丁酉葬於本縣仁壽鄉南岡之原初娶潘氏鄂州太守唐之女再娶張氏戶部侍郎運之女皆贈安人又娶莫氏亦先公卒六子千里千秋千頃千得千言俱夭第三子千乘今爲迪功郎新筠州司法叅軍能世其家一女適右朝奉郎知邕州葛永慶

再適奉議郎前知南安軍南康縣彭邦光有孫曰蟠女二人初公與今龍圖閣學士澹菴胡公同肄業鄉校其休致也胡公入佐冬官適奉詔薦士卽上疏曰李某文采議論皆過人尤長於吏事三爲邑五典郡然皆遐方僻地未究其才上官數交薦今雖老尙可治劇未報有諫官者乃以是咎胡公胡公坐去國猶念公不置移書責當路云諸公皇皇市駿骨而使老驥伏櫪耶嗚呼士大夫視時向背不肯犯嚴出薦口聞胡公勇爲義篤於舊而不以進退二其心寔不愧哉他日乘以其從兄靖州教授誦之狀遠來求銘予謂胡公知公如此乃近捨皇甫何也乘曰得胡公銘我先人之名固可不腐將如胡公德之不著何屬之子則

併著矣某曰然爲之銘曰

謂公弗遇耶則仕盈萬石矣謂公弗壽耶則年開九秩矣而縉紳鄉閭猶未免乎哀窮悼屈者以祿雖豐未究其用齒雖宿猶裕於力也雖然自古才能之士固有阨窮不沾一命短折冠於六極者矣公何戚哉公何戚哉

靖州推官張君廷傑墓誌銘 淳熙五年

公諱廷傑字漢卿姓張氏吳郡人曾祖政祖奭父憲錢塘尉母余氏累世同居鄉里義之漢卿少業儒未冠而孤事叔父烏程尉士能任其家政勤勞弗懈歲時親賓會集漢卿必冠帶侍側翼翼如也烏程既沒漢卿薄貲產均畀其子孫無毫髮私人皆

咨美起家迪功郎靖州軍事推官非所好也卜居城中之花橋用所以事烏程者齊其家內外整整羣從多饒於財漢卿獨刻意教子藏書數千卷士大夫喜從之游漢卿亦好客不倦也州西三十里有華山山腹有大池圖經云嘗產千葉白蓮漢卿鬻得之日課僮僕刈剔巖竇疏導泉流創亭榭十餘區環以佳花美木四時皆有奇觀戶部尙書孫公覲爲之記遂爲吳門絕景漢卿既葬其婦山中又自爲塚舍日往游焉生事皆置不問人多笑其迂然漢卿心計自有餘雖不作潤屋計而伏臘猶給無求於人既老預治棺槨衣衾曰吾宗鮮登中壽我則過之瞑目無憾矣淳熙三年五月疾革精爽不亂惟以和順力學勉子孫

甲子遂卒享年六十有六娶李氏左朝請大夫通判廣德軍寬
 之女先十七年卒五子長聖任早預鄉薦繼入太學為學諭次
 聖清皆前死今日謙曰頤曰復謙亦太學生謹愿有父風五女
 長適承議郎簽書南康軍判官廳公事蔡瑀次適文林郎新知
 揚州江都縣李安上早世次適朝請郎新知南恩州楊挺二尚
 幼孫男五人鎬錡銓鏞女三人謙等以明年十二月壬午葬
 公華山實與李夫人同穴蓋吳縣長洲鄉也昔外舅浙東提點
 刑獄王公葆光娶公姊姊兩家情好久而益洽予以是與漢卿往
 來三十年乾道壬辰予自小宗伯奉祠過平江徧游城西諸山
 漢卿時載酒邀予自靈巖入天平遂登華山訪古道舊為笑樂

最後置餞虎邱酒闌悵然曰某老矣再見恐無期他日尚誌吾
 墓予曰公尚強健何遽及此後三年予還朝復與漢卿通問無
 虛月又一年而漢卿卒其子以監察御史潘公緯所書行實來
 求銘予其忍辭銘曰

人生斯世孰能無求晉楚之富金張之侯無以憂之其無樂也憂

張本作無以收表表張公不膠不流治生求官與俗沉浮他人

營營已常休休有琴有書賓燕綢繆有子有孫弦誦優游生無

欣戚死何怨尤華山之原樂哉斯邱勒銘紀之名與山留

○ 秘閣修撰湖南轉運使蕭公之敏墓誌銘 淳熙五年

公諱之敏字敏中系出梁蕭氏五世祖自豫章徙居江州之湖

口會祖昇妣譚氏祖中山妣陳氏考固業儒而不求仕惟孜孜
教子後贈朝奉郎母安人彭氏公少好學有濟時之志李成剽
九江係累齊民如貫魚公亦被掠以書生獨免繫會夜賊醉寐
公密拔其刀斷民縛縱遣然後遁去時猶未冠人皆奇之登紹
興十二年進士第補左迪功郎蘄州廣濟縣尉未赴辟襄陽府
司法叅軍府捕強盜陳大漢等十三人不獲鄉民羣行適符其
數巡尉執送官不堪笞掠皆誣伏公約法疑之白帥移獄已而
楚州獲真盜闔府嗟異戶部尙書張澄吏事精明禮部侍郎陳
桷號醇正相繼來守屬吏奉承不暇惟公遇事爭辨辨不屈桷常
曰司法突兀長身他日眞御史也自是有蕭御史之名二十年

用薦者陞從事郎知歸州秭歸縣縣產椒漆蜜臘部使科買無
藝公一切拒之境有龍湫洞歲旱羣鄉禱雨不應公禱輒應民號
知縣雨循文林郎調建康府觀察推官舒州惡少張天錫父子
五人夜投宿僧寺僧不敢納天錫踰垣殺僧屢鞫不承承遷延數
年株連者多死詔江東選官鞫治公至天錫卽伏辜武臣梁俊
彥獻議增沙田蘆場稅詔同金部員外郎莫濛按視勢燄張甚
至叱責轉運使公不爲動稅以不增金陵大府貴游子弟多在
焉又常守以大僚郡事綱舉而已幕職曹掾官日夜縱飲歌呼
往往踰越法度諸司畧不執問公獨介然居中時箴切之受納
秋苗例別給餐錢公謝不受守固謂公毋妨他人公盡以修官

解戶部尚書韓仲通以法律進其居守也御僚吏嚴甚無敢可
否事民有刃傷盜桑者盜投繯死吏當其主故殺獄已具公抗
執不書仲通初大怒已乃薦公改秩時公在選調踰二十年未
嘗求之於人將代舉將猶闕府僚數十人死誦其賢於留守樞
密王公綸王公爲成之故左宣教郎知興國軍大治縣三十一
年完顏亮渝盟上司籍民爲兵日役數千人冒雪植暗椿鹿角
寨爲防江計公度不足恃徒困民力亟請散遣上司不能奪明
年兵解以疾去官隆興改元復知建寧府建陽縣邑大難治自
政和以來閱五十餘令終更者纔七人公至務以禮義化其俗
民翕然順從至繪像刻文紀公善政乾道元年轉奉議郎未幾

賜五品服三年選爲幹辦行在諸軍審計司未上有詔舉御史
大臣以公名聞五年四月召對便殿論正風俗上曰正風俗當
何先公曰仁祖時朝臣以危言讜論爲忠偷合苟容爲恥故風
俗醇正崇寧大觀而後反是在陛下示之好惡耳上曰誠如卿
言明日除監察御史六年轉承議郎七年六月輪對言人心之
於國猶身之元氣今欲復土疆其本在結人心譬之良醫治病
必先護養元氣乃可攻疾此非書生空言孫吳論兵亦出於此
上曰所謂一曰道而孟子亦云不嗜殺人者能一之又乞減冗
費省冗兵上皆嘉納八年正月秀州華亭捍海堰成命公按視
公還奏縣之四鄉鹹水壞田乞蠲賦稅三年上從之三月臺諫

慶曆四年志公集
官坐論執政奉祠去上以公分察歲久見謂直諫擢拜殿中侍
御史公感激思報爲上言治亂安危由言路通塞願備其官假
以事權毋使風采消沮又言前歲浙西夏澇秋旱江湖淮南歲
比不登民多流離今正陽之月天多沉陰寒氣慘慄是謂常寒
側身修行茲其時矣因繳進富文忠公熙寧初奏議上曰富弼
所論誠實有愛君憂國之心公知上聽納卽疏言漢災異策免
三公今宰相名任恢復實爲持祿保位計燮理乖方既不引咎
聞人言災異輒肆怒罵陛下昨許六察言事今乃令求實迹專
務蔽闕聰明故二三年來莫敢言其失併條奏擅權不公等事
上曰卿所論甚當可謂稱職於是宰相上章請去縉紳喜曰鳳

鳴朝陽矣會宰相復留乃除公直秘閣提點江東刑獄制詞有
剛方不撓質直而明造膝之辭有犯無隱正人去國豈朕所欲
之語蓋在職纔四旬所論如此直聲遂聞於天下既至江左郡
守多要官公舉刺各一人上皆罷行之所部肅然淳熙元年轉
朝奉郎召爲太府少卿公奏臣奉使無補何以復召上曰思卿
直諫耳公奏提刑並置文武非是互用一員足矣又論經總制
錢及額則賞是誘其求增羨也請罷之又奏諸路水旱頻仍今
歲僅得中熟而七月錢塘風潮壞堤岸居民死者數千人災異
在遠尙不可忽况都門之外乎又九月壬子距立冬纔數日雷
晝夜發聲亦非休徵惟益修德政轉禍爲福上曰卿直諫之氣

殊不衰未浹日兼權禮部侍郎進司農卿明年三月遷國子祭酒太學之士以得明師交相賀先是職事闕請托紛然公籍校定優劣升補先後爲之格遇闕則察行藝次第而授奔競頓絕舊制職事官例牒宗族補試是歲公自以長官臨涖令二子毋得入其後學官子弟中國子生者皆駁放始服公之先見頃之諫官論職名不當輕授公適引疾求去八月以本官提點浙西刑獄陸辭奏曰周公作無逸大概言畏天恤民和眾勤邦儉家省躬罪已有容德具此八善自然保壽無疆今會慶節不遠臣當需次阻奉萬年之觴願以此言爲獻又乞禁止外路獻羨餘又錄蘇文忠公治道篇以進曰陛下旣常置軾文座隅更願熟

復此篇以發聖學上皆稱美相與論無逸蘇文數百言三年改除湖南轉運副使道州江華縣稅重民瘠大軍錢三千緡上供米八百餘斛力不能辦公奏免之四年上以公舊嘗帶職超進秘閣修撰官吏畏公之正爭檢身恤下湖湘之民陰受其賜不可計公方厲志澄清欲徧行郡邑而病日侵上書丐祠得主管建寧府武夷山冲佑觀勅牒未至以八月丙戌卒於官舍享年六十六計聞致仕恩外特用前郊恩又官其一子蓋異數也士大夫識與不識皆太息鄉人至出涕相弔六年正月壬午葬於彭澤鄉加堰里小桂山之原娶同郡項氏天裕之女封安人生三子長曰顓前卒顓頊皆能世其家顓復以官遜其兄之子四

女長適通功郎筠州司戶參軍李景範次適進士張元觀次以疾居家次適鄉貢進士曹彥約孫男四人必誠必簡必聞必蕃女三人曾孫男一人公剛塞強義自其天性處心積慮公而不私平居聞時政之善若賢才進用輒懽欣贊美不啻如已有得至遇姦邪欺誕之人直欲折其頭角身之去就禍福弗計也所至以廉介稱一毫不取諸人其自奉有布衣所難能者當官毅然初若寡合及與人交表裏殫盡終始如一遇觴詠從容時溫乎可親也素無嗜好惟聚書至數千卷讀之不倦每見歷代及本朝名卿奏議剴切平正者輒三復慨歎恥躬不逮尤慕司馬文正公之誠實蘇文忠公之議論二書手不停披暗誦率數百

言樂爲晚進道之其後正色立朝不諂不瀆淵源蓋有所自紹興末都民望爲右正言公移書云司馬公倅并州猶上儲議且以告諫官范蜀公今足下實任言責事有急於此者乎民望欲薦公會卒侍御史周操又欲拔公入臺復以他遷不果晚受上知自謂可行所學不忍用細故塞責彈擊自宰相始上深察其忠顧勢不兩立姑聽外補未幾竟易相召公歲中數遷而公病不能留旋齋志以沒豈非命與初公仕不逮親故於同產尤極友愛常分俸給二弟弟力教弟之美後亦登進士第今爲奉議郎知蘄水縣公雅留意於易博問精思所得深遠暇日喜賦詩未第時都昌宰郭彥叅尉李蘊頗工詞章與公相琢磨詩名遂著

公沒二子既哀遺文爲三十卷復以蘄水君所狀遺事不遠千里謁銘於予予昔分教金陵實與公同僚方他人游戲相追逐必過予清談終日於今蓋二十年中間雖同朝者再而無前日之歎矣聞公云亡殄瘁是悲豈特念舊而已哉銘曰

維昔陽城安貧篤學振迹言路鳳鳴諤諤乃官成均士化端慤乃刺道州聲隱衡岳天生斯人艱兮難數侃侃蕭公文敏而樸或塞或通守道彌確礪兮真清蛻於眾濁以配前修誰謂其邈銘藏諸幽亦詔後覺

朝請大夫致仕賜紫金魚袋黃公子游墓誌銘 淳熙五年

公諱子游字叔言系出浦城黃氏號閩中著姓五世祖元吉事

江南李氏有詩名生全州司理叅軍觀登大中祥符元年甲科司理生太常博士孝先楊文公之甥尤深於詩蘇文忠公所謂一唱三歎者也亦以進士入官所至輒平反疑獄卒官博州貧不能歸卜葬陳之宛邱尚書左丞蒲公宗孟誌其墓子孫遂家宛邱後贈銀青光祿大夫於公爲曾大父妣建安郡夫人章氏銀青生朝散郎知潁州贈通議大夫好謙與二蘇同登科通婚姻蘇公謂孝友如曾閔者娶陳氏章氏皆贈碩人潁州生承事郎宰崇寧星變應詔上封事極論左右蒙蔽宰相蔡京切齒劾以誣罔不道逮付御史獄長流海島紹興初特贈直秘閣累贈右金紫光祿大夫卽公之父也母大寧郡夫人章氏公積厚源

遠鍾美聚粹以慈祥之性濟明敏之資少從伯父待制實蔭爲假承務郎金紫之就逮也兄弟訟寃於朝乞納告身贖罪權臣滋怒公號訴益力父得不死由是知名大觀三年入寶恩循登仕郎調相州儀曹郡僚負官錢六百萬守委公拘係公哀其窮縱之使逸守義之爲蠲其逋建炎初客南京歐陽澈以上書忤宰相棄市公適同邸收而葬之其子飛英年十四公傾囊輟所乘馬贈其歸棣州軍亂殘通判邵某家而誣以謀反邵子在鄉懼有後命公爲白其寃於本道轉運使竟官其三子未幾版授潁川汝陰令時軍需繁拏雖許預借夏稅而歲迫暮不能辦縣帑貯和買錢數萬緡公欲發之郡守不可公乃召民諭之曰某

戶當受錢買絹若干今計汝所輸夏稅留錢而給鈔汝歸徐以緡來公私大以爲便守下其法於諸邑四年避地歸閩道由嚴州之朱村土豪守險者臨公以兵老幼駭竄盡掠其貲事定太守柳約將以軍法窮治公力止之朱村人繪像以報紹興元年入監左藏西庫車駕自紹興移蹕臨安公請銜命先渡江經度臺省倉庫所寓畫圖以進後皆不易權度支郎官丞相呂忠穆公都督諸軍擢公江東轉運判官兼隨軍轉運以勞陞副使進秩一等公諉功同僚僉俟亦進秩人多其遜會安撫使與公有憾密奏公之與罪且不測叅知政事沈公與求曰諛有_軍被賞_軍遠曠職者且軍前無奏而他司僥言必讒也已而果然猶坐

奪一官會江西新羅劇盜朝廷知公仁恕選提點本路刑獄未
赴改知台州徙池州台產鹽池產茶姦毗囊橐其中重法不能
禁公治以輕典人不忍犯在池二年獄無重囚屬縣曰青陽僞
唐以爲宋齊邱食邑後因田租立稅額其重十倍公代還奏曰
國家涵養斯民二百餘年矣忍使青陽獨用李氏弊法乎詔裁
其半民爲立祠奉事至今久之求浙東安撫司叅謀官以歸自
是主管台州崇道觀者五稔遂致其仕積官左朝請大夫賜服
金紫以乾道三年十月三十日卒於正寢享年八十有八娶武
氏左正議大夫珣之女先公三十年卒初公卜壽藏於鄞縣豐
樂鄉金鷲山是歲十二月九日與武氏合葬焉三子仁傑右文

林郎監臨安府軍資庫仁儉文林郎新處州青田丞仁修從政
郎南康軍錄事叅軍孫男七人直與終迪功郎直清將仕郎直
已直益直行直愛直正女二人長嫁進士吳鐸之次許嫁進士
陳經會孫男女各八人公家傳孝友勇於義而安於仁處事未
嘗動聲色而曲折中理所居官咸可稱道靖康之亂挈內外族
姻數百指展轉兵間以身任其寒飢晚卜居明州奉化縣築聽
雨堂橘隱齋兄弟四人華顛相從歲時燕樂孫曾滿前百順具
備官簿當選置而不言遇大禮捨其孫而官猶子又竭貲以嫁
兄之諸孫閨門雍睦和氣可掬下至奴隸亦得其歡心善與人
交親疎一接以禮士大夫識與不識皆稱公爲長者丞相張忠

獻公每對客誦言賜歐陽事以爲今無此人矣公感知己歲遣
介問忠獻公於遷謫中其忠厚大率類此公既沒十三年三子
惟仁儉在屢以承議郎王度之狀來請銘惟某族姑歸公兄之
子仁術益依公以居者故不待識公而知其行義詳矣振宣幽
光宜無愧辭銘曰

浦城之黃世有君子公承以仁允謂濟美祿雖不多而壽則遐
嗟爾後人益保厥家

省齋文集卷三十三終

癸亥二月初九日授長和廣

省齋文集卷第三十四

周益國文忠公集三十四

邑後學歐陽棨介卿重刊

墓誌銘

○直敷文閣致仕魯公

嘗墓誌銘

淳熙五年

紹興初魯如晦季欽兄弟問學詞章一時競爽名卿毗陵張公
守胡公世將爭爲延譽或比之二陸已而同奏名禮部別院既
仕各以議論才術自見爲郎爲卿爲郡守監司職業交舉天子
器之年至先後掛其冠里居康寧瀕八十乃終洪範五福蓋庶
幾焉乾道中如晦沒季欽屬予銘其藏季欽之葬也二子復以
爲請何可辭公名嘗字季欽世爲秀州嘉興人徙海鹽之武原

會祖延厚祖惟辨父贈正議大夫壽寧妣碩人劉氏公起家左
迪功郎臨安府餘杭縣主簿以正議年高求監潭州南嶽廟未
幾遂丁憂免喪爲廣德軍教授陞從政郎時宰有雅故公不潔
求僅得台州教授用薦者改宣教郎知衢州江山縣爭訟數十
年不決者公曉以義理多感泣愧謝縣舊科糶本乾薑羊錢歲
二萬緡二十六年有詔蠲免而州家用不足別取之民公經畫
權酌以其贏代橫斂公私便之守言諸朝下其法他邑遷奉議
郎大宗正司主管財用分治於越三十一年明堂赦恩賜五品
服上登極繼如晦主管官告院請覈空名告身在諸軍者冒濫
頓革擢國子監丞未上改太常丞隆興二年冬召對論人主當

法堯舜及言文武未盡其用百司不守法度天語稱獎拜監察
御史公以左相陳文恭公叅政錢公端禮姻舊固辭上謂二公
曰嘗朕親擢何辭二公言典故不可違欲用豈豈無他官乃改
吏部員外郎是歲浙東西水災民大飢疫詔郡邑賑濟選郎官
察之公使浙西所過發倉廩人人被實惠具施行次第歸報又
陳荒政六事上甚嘉納特遷一官嘗攝右史侍立上顧左右稱
其儀矩凝重且有端人之目俄進太府少卿輪對及治道機要
上曰卿老成今處司府凡事宜盡誠退卽條奏文書牴牾事上
諭宰相如魯豈留意職事何患不治兼權大理少卿公益感激
奮勵遇事可言不以非其責弗言如論海道備禦蕃舶事宜緝

錢會子輕重相權催科綱運致弊不一咸得要領至言徇私植黨請謁交通辭尤激切會舉行出入更迭之制公在卿寺蓋二年矣首請補外除直敷文閣江西轉運副使所部適旱詔趣行隨以璽書詢管下雨澤何如公夙夜布宣上德歲以不歉作卷兩樓於廳側自爲之記本道上供米九十餘萬斛歲費錢十餘萬緡造運舟於贛吉其來已久使臣綱梢積習侵盜甚則繫舟沉之大率數年輒欠三十萬斛惟江袁興國建昌四郡專募客舟未嘗損也公具以聞詔官舟客舟均用須歲終較其利害徐議更制公乃捐枋木錢助諸州雇舟又蠲民間水脚錢十一萬緡卽漕臺置艘二百備其闕而贛吉船塢遂罷徙浙東提點刑

獄公事又徙閩路公已倦游力請奉祠得主管台州崇道觀遂致仕積官至朝請郎公之自廣德歸也大闢園囿手自種植名曰日涉至是殆三十年木皆成陰亭榭增華公日從容其間歲時醞酒會賓客鄰里以爲笑樂名士多賦詩美之淳熙三年八月十日以微疾卒前三日猶秉筆作文臨終精神不亂其所養如此享年七十有七先娶陳氏朝議大夫正原之女繼室以其妹蓋忠肅公族也再娶曹氏武惠王之後亦前卒皆贈恭人三子可宗登隆興元年進士第後又中博學宏詞科終修職郎南外敦宗院教授人皆惜之可羣迪功郎監潭州南嶽廟可舉將仕郎五女長適朝奉郎知德安府周頡次適迪功郎監秀州支

鹽倉陳綱次適國學進士胡懷祖次適迪功郎廣德軍建平縣主簿葉巖次在室孫男五人符籥筌策節孫女八人長適迪功郎監行在編估打套局門黃聞餘尙幼曾孫男女三人初公卜

地於湖州武康縣慶安鄉後汪村之原規畫兆域旁築息菴隨

一祠堂張本作相室環以松竹扁舟時至其上公既沒二子奉柩以

葬蓋四年三月二十日也公力學強記年十二下筆驚人入京師大學每從儒先質疑義聞見日廣刻意古文恥作蹈襲語下至尺牘亦可觀喜論天下事延對述安危治亂邊防形勢甚備兩上萬言書極陳利病當官務行所學必欲事事辦治平居喜稱人善而覆匿其短貌莊氣和輕財重義勤於接物少老如一

著述有易說二十卷論語解十卷蒙溪已矣談集四十五卷後集二十卷須江雜著六卷會稽酬唱二卷芻狗集十卷芻蕘編十卷南征錄二卷自警錄四卷編集祖宗訓典五十卷編注杜少陵詩十八卷又年譜一卷昔予攝承詞掖公由會稽入朝袖詩數十篇爲贄格律高妙予竊敬焉其後公持節按行廬陵遠訪予於郊野自是問訊無虛歲情好滋洽非特以葭莩之故也既序公出處又系之以銘曰

降才者本天成之者人如彼良疇勉其耕耘歲有飢穰我無阨貧敏乎魯公能濟以勤既裕於政亦昌其文既食其實亦彰厥名有始有終以沒元身肇營新宮山環水縈生樂斯邱死反其真

我爲銘詩式穀雲初

武昌簽判尙宗簿

大伸

墓誌銘

淳熙六年

公姓尙氏相州安陽人世以武勇聞左金吾衛大將軍贈本衛上將軍諱從諫者公之曾祖也生二子分習文武業其一掌麟府軍馬號名將其一以累舉入官贈太中大夫諱棐者公之祖也父諱佐均博學工文章登進士第歷校書郎禮部郎官國子司業祭酒終朝請大夫直龍圖閣後贈某官亦生二子長大倫終迪功郎公其季也諱大伸字長道以父任爲將仕郎紹興五年補右迪功郎監西京中嶽廟版授臨江軍新淦尉調吉州司戶參軍用新淦捕盜賞改承務郎權知贛州安遠瑞金兩縣又

權筠州之上高皆用治辦聞以母夫人杜氏年高求監饒州景德鎮視事不一月丁杜夫人憂時二十五年七月也服闋知贛州宣都縣賜緋衣銀魚秩滿簽書威武軍節度判官廳公事西外宗正簿又佐武昌軍淳熙五年閏夏大暑人多病癰疽公亦瘍發於背庸醫妄投藥再旬不瘳公志氣安定手書後事諄諄七月十六日坐而逝得年六十有二惟吾伯母實公之媿靖康兵亂公年尙幼依伯父入蜀亂定來江南伯父謂我女兒早孤而賢命歸公重兩家之好險阻艱難殆三十年共立尙氏之門戶是生四男振祖振英振操_諱振德女長適從事郎田橡次適將仕郎羅尙賢次在室餘天公自爲兒童侷儻有大志遇事知畧

常出人上少長氣貌瓌特議論宏偉未三十卽治劇邑吏懷姦欺來前輒迎毀其機牙咸懾不得發頑民屏息善良吐氣推心腹待僚佐有不合面折之已乃懽然未嘗虞其怨也性不樂軟熟媚耳目每與上官辨曲直爭利害坐是抑厭不進益懷奇負氣閉門讀書晝抄夕校忘寢廢食聞有奧編隱帙百方求之以故博古多聞所至屈其坐人尤嗜資治通鑑編類數四往往成誦有來問者應答如流平生喜劇飲當酣適時談張本論作談貫古今志意薄霄漢聽者欣聳雅工詩下筆滾滾數百言其豪邁慕李太白精博學李義山而思致綿麗又效溫飛卿至其得意處自謂不減古人今有家集十五卷和陶詩一卷存焉初公以宣

和六年補官五十年間輩行皆至大官公纔爲承議郎當上考功課進朝奉階延賞於後乃不能待然公苦心教子家四壁立縮衣食之奉招致館客又躬督其課程夜以繼日振英已嘗舉於鄉矣詎知造物不使諸子益奮於學自致名宦寔失於此將得於彼耶公輕財重義周急不計有無雖甚珍愛之物人或稱美與之無吝色身後僅餘圖書好玩數簏而已歲在丙戌女兒卽世公卽卜地於吉州廬陵縣某鄉之原置雙穴焉一星終而公沒諸子乃以是年某月某日敬承治命奉柩合窆遠來求銘泣而銘之曰

大阿久柙用乃缺兮驩驩久繼進而蹶兮命實制之非我拙兮

生雖有涯名不可滅兮

○恭州太守任君

續

墓誌銘

淳熙六年

君諱續字似之潼川郫縣人系出漢廣阿懿侯敖懿侯十六世爲晉安東將軍顒顒九世爲隨潯陽太守璧謫掾閩中以死子孫因家焉璧生穎穎生業業生雅相唐高宗其曾孫晄疇皆達官太和中詔以二龍旌其里晄生椿嘗參梓州軍遂徙郫之興城椿生韜符韜符生崇誥崇誥生琦琦生仲簡仲簡生伯傳登景祐五年乙科仕至尙書都官郎中是爲君之曾祖都官生庚終普州司理司理生忠原終朝請大夫知黎州君之祖與父也文獻相承衣冠不絕蜀人論氏族者推焉君少以父任爲將仕

郎父疾革戒君曰興城之任世以儒科顯爾不可忘命易今名字君泣拜而志之紹興七年起家爲漢州雄縣尉十三年又尉昌之永川夙夜銜父訓懼從事不能卒業十九年求監潭州南嶽廟二十一年遂中進士第選澧州州學教授晨策羸馬從一僮謁守丞退則繙校遺編盡日與聖賢對他無所問當路交薦二十八年自承直郎改左奉議郎復求開州教授而去隆興元年就遷夔路轉運司主管文字朝廷歲糜緡錢數百萬市馬川陝歷梁洋下襄郢山行險遠道斃之餘至臨安者皆骨立有大吏請治舟峽中乘漲水載馬東下旣駛且安詔從之無何官吏奉行弗虔效率者又加迫促資糧芻粟篙師權夫一切取辦於

民急若星火州縣大擾乾道二年春君適還朝上疏言請調他道禁旅分屯夔峽代民駕舟事已教閱如故異時荆楚出師北伐亦可爲上流聲援召對下其說君因論三事曰大臣雖罷政猶當體國安得苟且便安宜使分守邊要漢部刺史察舉二千石今監司專繩小吏夔鹽惡而直倍漕敷州縣州縣計口抑民瘡痍一道上嘉納之擢守涪州未上易恭州四年春蜀大旱常平義倉素空竭姦氓姚京給言官廩有餘誘致四方流冗冀以挺亂君知其謀既案京抵罪卽捐俸錢五十萬募民入粟闕境爭勸趨之饘粥廬舍規畫有序至者如歸帖帖無事璧山有淫祠民病輒解牛以祭君下令禁止訛言神云守奪吾祀民與牛

皆將疫死郡人大恐君知廟巫實導之係郡獄巫駭服巴縣令貪虐君劾去之其子飛謗於朝言者因論君前議舟師爲迎合八月罷郡事六年夏主管台州崇道觀命至而君以疾卒於左綿實九月戊子也淳熙丙申冬葬仙雲山之下得年五十有七積官左朝奉大夫君靜重廉介篤學喜爲文身修家齊勇於爲義嘗傾產以賙嫠媪教養孤甥迄有成立仕宦三十年先疇一無所增身後妻子假貸以斂君凡四娶二李氏鮮于氏皆贈宜人今夫人王氏御史利用之女有賢稱子男七人義山與元府西縣尉義問義路義舉義端義明義正女三人一嫁文林郎馮適之一嫁進士鮮于糾宗一尙幼所著書號仙雲集者二十卷

又有任氏春秋十五卷春秋五始五禮論五卷篆隸石刻譜三十卷歲戊寅冬十月君調盛山教官過金陵予分教在焉以同年進士置酒道舊見君氣貌瓌偉議論慷慨意其將爲世用孰謂君止此也比歲識其子義問於行在所博洽能文奧篇隱帙問無不知君可謂有後矣任氏其與乎義問將還蜀出石泉太守章森狀君之行實乞銘於予義不可辭銘曰

謂君窮時旣逢謂君通志弗充德之洪報也豐劬爾躬後其隆

○朝散大夫直秘閣陳公

從古

墓誌銘

淳熙十一年

自古有志功名之士常患其才無以高世才高矣未必逢其時時逢矣不必皆爲主知幸而見知則摩九霄撫四海非難也然

而將起輒仆未耄遽沒茲非命與嗟吾希顏不幸乃如此交友聞而悲之况予先大父與希顏之大父爲同年進士予又綴名希顏榜中在期集所日日相從間雖出處不齊而契愛厚矣晚預政中書每聽玉音論當世人物必才希顏顧不能悉力薦引使以所長大顯於世則夫悼惜愧惜豈止同乎眾人而已今其仲子纘經來告曰先君葬有日不肖孤舍几筵而銘是求成遺志也將紓予悲不在茲乎乃序而銘之希顏姓陳氏諱從古系出漢文範先生文範生謙謙生忠忠生佐佐生伯珍晉建興中渡江居曲阿新豐湖卽今鎮江府金壇縣境也故君爲金壇人會祖廓熙寧九年進士仕至朝奉大夫利州路提點刑獄事祖

唐書卷一百一十五
州
城登第在元符三年終文林郎知真州楊子縣父維婁貢禮部
竟以特恩入官主信之弋陽簿後贈朝請大夫君天資雋敏兒
童時應對賓客有成人風稍長自力於學爲文辨麗閱壯儒先
交譽之紹興二十一年中進士第七陽府君喜曰世業有傳足
澡吾恥調臨安之富陽尉秩滿用賞改左宣教郎爲邵州州學
教授殿中侍御史張震議拔君入臺會遷中書舍人而止入監
左藏東庫未上丁弋陽憂免喪監行在權貨務都茶場丞相虞
雍公問君終歲出納幾何君曰國家利源齟茗居半自合同關
子行遂虧常額丞相命君卽都堂條救弊之策於是關子罷而
歲入增矣都城浚運河丁夫輦泥積務門君爭曰隙地以遠火

災室之可乎尹恃勢弗聽君朝衣坐泥中上聞之夜半爲降旨
禁戢已而車駕閱武近郊君進詩五十韻姓名益簡上心命措
置浙西鹽事以勞擢司農寺主簿坐法免旋起知蘄州赴闕奏
事上曰卿書生能通世務昨宣力務場爲多獎勞久之到郡期
月上以湖南歲比不登選君提點刑獄始至衡陽民有被誣以
淫祠殺人者更三赦不決君奏釋之詔下而兩教官作平反堂
記紀其事時乾道七年也十二月就除本路轉運判官以明年
二月視事專任荒政蠲逋欠以萬計御札令同帥臣收養貧民
所棄嬰兒君悉心奉行楚人德之夏秋復閔雨請禱嶽鎮遂大
有年武岡徭人憑恃谿谷創立樓櫓議者欲以兵問罪君曰往

周益國文忠公集
連不稔彼迫飢餓爲保聚計耳今可文告定也遣吏鑄誥酋長
帖帖聽命其後長沙水溢穿城郭敗廬舍君督吏卒疏理池隍
計戶給土木費人忘其災事聞復下璽書問狀併論賑濟功特
除直秘閣是冬京西謀帥上閱諸道監司姓名指君曰陳某有
才無以易之九年正月開府於襄卽奏言朝廷以襄爲上游重
地增陴益戍緩急許調鄂師善矣但節制不一莫知適從紹興
隆興間嘗萃荆鄂兩軍於此分地以守東盡隨與棗陽鄂帥趙
樽主之西盡均州光化軍荆帥王宣主之權均力敵各行其說
樽欲持重宣欲轉戰此不立統帥莫相臨制之失也今若合爲
一軍擇宿將爲都統制屯武昌置副使屯襄陽或一年許其更

戊則號令歸一無敢首尾誤國矣疏入上適有此意四月乃用
吳挺爲荆鄂駐劄諸軍都統制而以王世雄副之分治荆南其
後荆南軍竟更戍襄陽至今以爲便北界有叛者來金以兵壓
境或請增戍受降君固執不可揭榜境上示無招接意金兵遂
退上謂丞相曰從古倉猝應變足銷疑沮之謀可諭此意以獎
之淳熙改元復坐論列而罷二年春主管台州崇道觀自是閑
廢者九歲上眷之不衰鑄錢使者嘗缺召君欲用之繼卽其家
連昇衢饒秀三州印綬皆不果行君自知數奇願復食祠祿朝
廷爲修廢官差主管南京鴻慶宮卜築洮河上奉親教子之餘
猶孜孜國事時有所見聞輒論著告於有位鄉邦游飢周恤甚

勤居閑好客酒後談論激烈聽者忘倦自高曾以來世工篇什君及從呂居仁向伯恭蘇養直游往往得其句法尤愛陳去非詩取簡齋集盡次其韻袁古今詠梅自鮑參軍而下迄近世名公得古律千餘篇次第屬和豐腴清婉兼備眾體無支辭複語駕幸秘閣君自以寓直其間奏百韻詩以賀詔與宰執侍從等所進同付史館縉紳以爲寵九年秋以事嬾城中八月二十日還至半途遇疾而逝於是母夫人譚氏年八十六矣君孝而不得終養是尤可悲也積官朝散大夫得年六十有一娶薛氏承議郎諸王宮大小學教授璿之女嫁時年二十四逮事尊嫜孝謹知書宗族稱賢再封安人前君九年卒追贈宜人五男子伯

震從事郎監江陵府糧料院中巽當以致仕恩補將仕郎叔謙季益季咸未仕女適從事郎興國軍判官趙師沔孫男女四人伯震等卜以十年十一月二十九日葬君本縣唐安鄉茂城之原舉薛宜人柩祔焉其地介於祖考三塋間銘曰

孝友以爲質詩書以爲輔科名世其家才術知乎主天於希顏可謂厚其賦予矣旣黼黻之又齟齬之竟何取哉竟何補哉

省齋文彙卷三十四終

癸亥五月初九日懶飯後校此